

槐南集

249
53

魏

南

集

45. 3. 7

丙亥

辛亥十月永坂周題



版存于三李堂

槐南集序

凡學術有繼述之者而後鞏固盛大可以永其傳矣昔者伊藤仁齋唱古學排斥朱學然未盛行及嗣子東涯以該博之學多著書以繼述之始鞏固盛大門派傳授至今不絕我槐南森君於其父春濤翁之詩學亦有似之者焉翁方明治之初崛起樹旗幟振興戰後頽廢之詩教時流頗歸嚮然單力維持未盛行君以卓越之才兼勉勵之功自葩經楚騷文選至唐宋元明清諸名家之詩博涉潛讀搜腦髓厚蘊畜以繼述之於是其學鞏固盛大聲名大起官授文學博士世仰爲詩宗不幸雖

中道短折門徒徧四方流風餘韻之傳後世恐不讓伊
藤氏之經學矣頃者門人編遺彙成徵序於余余不知
詩姑敘其繼述之孝以弁卷端抑今日經學衰頽幸賴
君振作之力詩教盛行則自詩入經者未必無之余言
及此者聊寓望蜀之感云

明治辛亥晚秋八十二叟中洲三島毅撰

槐南集目錄

卷一

古今體詩一百十一首 辛巳 壬午

卷二

古今體詩七十三首 癸未

卷三

古今體詩四十五首 甲申

卷四

古今體詩六十六首 甲申

卷五

古今體詩七十首

乙酉

卷六

古今體詩七十八首

乙酉

卷七

古今體詩一百十七首

丙戌

卷八

古今體詩一百八首

丁亥

卷九

古今體詩七十九首

丁亥

卷十

古今體詩九十五首

戊子

卷十一

古今體詩八十首

己丑

卷十二

古今體詩九十一首

庚寅

卷十三

古今體詩一百十七首

辛卯

卷十四

古今體詩九十三首

壬辰

卷十五

古今體詩八十三首 癸巳

卷十六

古今體詩一百十六首 甲午 乙未

卷十七

古今體詩一百十八首 丙申 丁酉

卷十八

古今體詩九十五首 戊戌

卷十九

古今體詩一百首 己亥 庚子

卷二十

古今體詩八十七首 辛丑

卷二十一

古今體詩一百二十六首 壬寅

卷二十二

古今體詩一百四十二首 癸卯

卷二十三

古今體詩一百九首 甲辰

卷二十四

古今體詩九十一首 乙巳

卷二十五

古今體詩九十三首

丙午

卷二十六

古今體詩一百十五首

丁未
戊申

卷二十七

古今體詩一百二十三首

己酉至
辛亥

卷二十八

詞九十六闋

曲

小令二闋

南北曲二套

先考槐南先生遺彙古今體詩辛巳至甲申槩係手
定乙酉以後則及門諸子共相商訂逐年編次別有
詞及散曲合成一部凡二十八卷付諸手民以傳于
後云

明治四十四年十月男健郎謹誌

槐南集目錄

槐南集卷一

東京 森大來 公泰

辛巳

雜擬

階下春悄悄芍藥泣清曉昔為有情花今作將離草憶昔十五餘許嫁從阿姑十六為君婦自誇夫婿殊春風陌上桑采采盈我筐秋風動機杼催織君衣裳十七與君別音書空斷絕欲寄春蠶絲繫作合歡結蠶化成雙蛾將離復如何折之當誰贈枝上春淚多

南園衆兒女鬪草笑相語姊掇舊王孫妹拚新宮人含

胎大婦結宜男中婦纈少婦何限情芳草原無名
哀哀尾家子抱柱泣寒水水來君不來君生我獨死瘦
蛟螭我骨老鰓啜我血水聲如鳴冤萬古長嗚咽嗟哉
東海禽銜石知何心石爛情不朽魂魄何處尋

行路難

行路難晨出玉關暮度陰山飢魂哭雪馬嘶急黃沙白
草風酸酸驚鴻影失塞雲黑隴頭流水鳴哀湍死聲入
笳月滅沒危峰如劍星闌干我一歌兮遠征苦公無出
門行路難嗚乎行路難難復難
行路難身在長安夢隔關山秋閨少婦怨長夜空簾默

拜月一丸簾前梧葉忽飄去涼風吹露搖團團可憐心
在轆轤上莎雞振羽銀井闌我再歌兮少婦苦公無出
門行路難嗚乎行路難難復難

我欲吹鐵笛鐵笛吹裂朱唇寒我欲掣寶劍寶劍生澀
腥血斑我歌三闋調轉促公無出門行路難嗚乎行路
難難復難

新春家醺

膝下團欒獻壽觴霽然誰不拜餘慶前山欲曙酒痕碧
新柳入春鶯韻黃應有仙方堪卻老可無豔筆擬催妝

以去年庚辰
十二月新娶

一家相賀長如此暖透梅花笑語香

楊柳枝詞

酒醒河梁分手遲一纖纖月上人眉惟銷魂者別而已
何以贈之新柳枝
江波灩灩月留痕尙道前生萍有根一夜春風無藉在
不將絲絮裏離魂

無端二首

無端拍手笑呵呵時復擡頭喚奈何穿鑿其誰非混沌
盈虛惟我與姪娥花殘瘦蝶夢還小春老古鶻啼不多
猶有風懷餘結習畫簾重聽美人歌

蒲團一夜坐來初撥火時披古佛書烏有先生非假相

南無菩薩是真如花籠鮫帳心香幻月透蟬紗魄影虛

誰道色空成綺累破禪畢竟悟禪餘時有目余詩爲僞情癡假風懷者

送永井三橋敬西游次其留別詩韻

橫塘早有鳥啼過似按旗亭一曲歌山倚暮寒花易雨
水吹空翠月生波但憐春酒愁前醒定合新詩別後多
聞說此行經故里松楸款段悵如何

反游仙

紅牆秋徹媧皇笙絳雨啼石天吞聲仙之人兮夢亦幻
蕙佩乍碎叢鈴鳴銀河無影渺烏鵲參商空隔澹雲碧
露凝珠樹警花魂霜裹星衣蘇月魄嗚乎人天何處無

別離仙家亦賦長相思君不見媧皇補恨天無迹誰知
裂作望夫石

碧雲如雨瓊花溼霓裳秋透暮寒入吹簫嬴女素鸞扶
鼓瑟湘靈修竹泣無朝無暮仙夢飄非雲非雨仙魂銷
鮫珠露小月豔豔銀浦水淺星迢迢須臾星轉月亦黑
回頭天上皆荆棘麻姑死去滄海枯劫風吹桑荒罔極

團扇詞

月近銀牀絡緯寒機中齊素織秋紈涼風吹入君懷袖
猶自裁爲古合歡

野口松陽先輩

常共

毛山探勝錄題辭

齊州九點秋半壁毛山雲影蕩空碧有人嘯傲翠微巔
古心窈入煙竹笛笛腔悲壯虛籟沈餘音落水幽于琴
香湖花墮紫杜若古澤猿老青楓林

毛山之勝以香山爲第一香湖杜若猿澤秋猿則香山八景之二

雲煙變幻供采掇薜衣蘿帶風飄忽欲吹成雨空翠深
當頭如笠一丸月月影銜山曉暈圓山下石氣蒸靈泉
凌晨放眼乾坤小靄靄仙人丹竈煙

以鏡贈別

菱華泣露珠珊珊一泓初曉秋潭寒淚妝難掩別時恨
啼眉仍耐前日歡惟期團圓若明月所悲棄置如秋紈
妾心一片託古鏡贈君聊當青琅玕不願報以忘憂草

只願遺我同心蘭同心為佩與君結母負比翼雙青鸞

訪三橋新居次其題壁詩韻三橋西游數句回

綠陰如畫夕陽疏清簟無塵養靜虛小鼎香殘風裊後
古琴韻澹雨涼餘是花是石是修竹宜醉宜吟宜讀書
瀟灑庭階幽趣足仙人何必要樓居

我我周旋與世疏果然名下士無虛才之大者偏心細
詩有工夫豈緒餘八九寓言千古事二三知己十年書
竭來多感騷人意杜若春風又卜居

往事談闌燈影疏人生離合月盈虛殘碑苔蝕荒蕪下
故土煙沈落照餘蠶死有絲抽別恨雁來無字不家書

當時我亦飄零極秋雨秋風感索居世間以前天許遠
散髮披襟蕭蕭又疏焚香鎮日學玄虛鷓鴣啼老樹關愁外
蝶出殘花午夢餘人事渾歸歌哭笑仙情別託畫詩書
也知門有問奇客載酒晚敲揚子居原擬無題思亦

六月念五楫取耕堂大冷招飲分韻得琴同大

沼枕山厚小野湖山長諸老及家大人賦

簾波一桁碧沈沈翦燭重談別後心不語仙人淩倚水
無聲古月韻如琴冰紈搖影螢飄瞥白紵吹涼秋淺深
回首觀魚亭上酒墨痕香澹舊題襟余前年隨家大人游前橋君為設
鮭觀魚亭時酒微逐極一時之盛

戲贈

泥人嬌唱懊儂歌宛轉回身注眼波匿笑從郎索春淚
海棠經雨暮寒多

聞蟲短歌關根癡堂

不鷓鴣雨莊席上作

半夜當戶織問女何所憶不聞停梭歎息聲推闢階下
露蟲鳴唧唧曙河雲散星斗稀新霜欲重秋花枝南樓
少婦獨不見西苑癡菱長相思啜其泣矣淚成雨亂不
可理心如絲女也無所憶女也無所思雖無所思亦歎
息蟲乎蟲乎何所悲

秋夕醉後走筆作長句自亦不知作何語也

卷八

蚩尤驚逸共工奔鍊石填成太塊根地陷以前天有影

蚌胎而後月無魂三千弱水瓢中注八九雲夢胸底吞
我恨長房術殊小不能縮住莽乾坤

夜中不寐起長歎魑魅爭光鐙影寒豈有天公奇妬痞
曾無人世大疑團悔來聊答前言戲死後方知末路難
安得疲驢馱夢穩百年睡過古邯鄲

睡漢饑腸亦滌塵黃梁飯後見精神枕中自結長生果
世外誰干有漏因乞丐道人仙本相風顛和尚佛真身
茫茫渺渺空空寂打破來時一欠伸

殘星閃澹月虛明長夜難消倚短檠飢雀驚霜寒抱影
荒蜚咽露慘吞聲人如無死何傷別佛果能靈定有情

禪外古心灰不了一樓鐘杵抵三生

老天遺我此窮愁甘受兒曹笑不休破硯冰凝人默默
微燈豆點室幽幽麤豪說劍黃衫俠寒瘦哦詩白首囚
賸有一身如落葉蕭騷風雨送殘秋

詩家陳套畫葫蘆敦厚溫柔兩有無逐子秋心託蘭杜
離妻春恨憶靡蕪文章未免成魔障快活難忘是狗屠
儘有人間不平事悲歌聊當辟愁符

晚秋杉山三郊

令吉

冒雨而至貌甚憔悴云將養病

香山怱怱話別意殊悵惘賦一律以贈

來矣突如疑未真無端話別更傷神此時黯黯天將夜

亦復蕭蕭雨打人慘澹愁容爲詩瘦淒寒酒味祇秋辛
須臾君去燭還燃轉覺虛堂蟲語新

寄懷三郊在香山

古毛之野有遺狂一夜客星光燄長大笑摩山作平地
忽然叱石化羊羊笛腔欲裂月深黑雨脚驀奔雲莽蒼
天上仙真齊指點晒他展足洗靈湯

湯泉雖濁有餘清知是仙人鑪內烹雲氣欲浮烝未化
石胎乍迸熱仍鳴兔庵月墮曉吹暈

香山向岡有玉兔庵

猿澤楓寒秋

有聲浴罷彈冠先一笑不須更復濯吾纓

采桑詞次三郊香山唱和韻

采桑誰是最天斜秦氏羅敷年正華小籠青絲結春柳
上襦紫綺拖朝霞杏梁日暖箇儂宅燕戶泥融夫婿家
只恐陌頭琴調促惹人惆悵路旁花

聽三郊談金洞之勝

秋雲半壁蕩空荒有客振衣千仞岡石赤字青苔髮脫
山狂谷很樹身僵怪花猶蝕古春色毒霧欲吞寒月光
撒手相逢老魍笑懸崖直下雨浪浪

歲暮道情

十年心事把香燒一半將灰一半焦破屋寒燈光閃澹
四無依倚竹蕭蕭

冷炙殘杯又破甑先生色死似枯禪真機一轉梅花活
忽漫香吹古壁前

每至歲闌知我貧窮愁一例是詩人粗茶澹飯平生事
味到梅花酒太醇

賴有忘憂酒一杯一杯杯笑逐顏開無端百八鐘聲動
叩起明年煩惱來

壬午

新春多暇有以何必西廂彈詞索詩者戲作八絕
句

半是聰明半是癡有情眷屬佛慈悲秋波一轉參禪悅

翻入盲詞盡色絲

笑煞才人錦繡腸祇能巧寫野鴛鴦誰從鄭衛開生面
文到無邪綺思香

塢上桃花春可憐無端歌哭度中年黃金兩袖淚如雨
吹散東風榆莢錢

死死生生歡又悲一齊拋棄入宮時依然少小風流性
不愛君王愛乞兒

被髮狂夫曾渡河篋篋嗚咽奈公何傷心一樣寧王笛
吹向江心入破多

不見湘靈鼓瑟迎香魂冉冉夜朦明大江秋激星光迸

萬古蛟龍痛哭聲

一例欺人歌大風笑他馬上假英雄四方猛士知何用

威武將軍是乃公

美人淒倚竹橫斜仍是山中高士家翠袖乍驚拋夢起
一瓶寒月耿梅花

戰城南

戰城南死郭北鼓皮慘裂天無色降旗影倒塞雲直野
有哭聲茫然風沙魂不上天魄不歸家魂魄嗚咽悲哉
征夫行行生別離肌瘦啼眼枯去去行路難身死填溝
渠城上月荒黑風苦飢烏銜肉作人語啞啞是誰頸血

是誰髮啞啞啞匈奴屍漢臣骨

二月十三日先妣忌辰志感

麥飯梨花欲夕陽自攜新婦拜靈牀夜臺含笑應消受
鑪內還多一瓣香

回首故林生暮哀曾經款段一徘徊不堪秋送蕭蕭雨
黃葉聲中掃墓來

偶占

途歌巷哭太麤豪何似晉人風格高欲買江魚供痛飲
知他腹有古離騷

俊煞風流才子名小人頻作不平鳴可憐懷璧非其罪

肯道偷香便有情

清國公使館參贊黃公度遊憲改官米國桑港領事

將赴之賦以贈別

滄海月白涼紛紛旗章波織星漢文天雞一聲碧樹曉
空水縹緲吹仙雲雲之君兮拖霞佩紅日射浪老魚拜
依稀人在扶桑東扶桑猶隔蓬島外蓬島暫且留旌旂
天風浩浩隨白鷗閩苑新傳紫閣詔月槎更復凌滄洲
煙濤茫茫雲幻滅鮫人手擎一丸月靈鼉按鼓敲柁樓
老蜃嘯氣現宮闕中有織綃娘子邀倩君詩句題冰綃
雲母玲瓏透空薄鏗然寶瑟風飄搖侍女隆隆磨麝墨

醉筆署來水精國夜闌漏滴玻璃寒屏外蠟煙如燾直
讀史偶占

六尺身材一肚皮無些血性不男兒豈求羸政長生藥
欲撻平王未死屍孺子橋邊偷進履英雄市上獨吹篴
雖然痛癢非關我也哭他人失意時

春詞

花飛片片絮飛輕人道春風是不情絮自飄搖花自舞
我憐少女太憨生
絮欲爲萍別恨多兒家爲唱送行歌桃花大有離人淚
春水生時莫近他

偕室人湘秋小妹湘蘭看花東台

聞道紅櫻淺暈脣綺羅香雜馬蹄塵我來卻伴梅花婦
冷看春風得意人

催妝詞爲杉山三郊賦

三郊娶川田甕江先生剛女先生媵以十三經羣芳
譜作文紀之頗傳唱一時

燭枝雙影照娉婷玳瑁簾櫳翡翠屏果信書中女如玉
小紉匳底十三經

菊有陶家蘭屈家牡丹雖好較肥些可知儂是林逋婦
母愛羣芳別姓花

小鬟將燭悄移來笑道新娘心可猜只是不教明月入
羅帷舒卷任他開
澹月梨花瘦不支仙郎微笑下簾時沈香火底吹笙罷
低語春寒好護持

雙栖鴛鴦曲

萬古雙鴛鴦兩兩老不死飛來曉月黃飛去暮花紫月
氣霧成煙花霧吹未已鷗避波痕豔魚驚浪影綺春夢
一何短飄搖命如紙殘月蝕古魄飛花葬新水鴛鴦復
鴛鴦浩劫茫茫風雨荒不能繡上合歡被離宮瓦裂啼
秋霜

暮春雜感

滯酒濛如病裏人維摩禪榻認前身樓臺垂柳語鶯歇
門巷綠陰啼宇新春死偏憐花片殉夢虛方悟雨聲真
博山鑪底香灰冷一縷心香繫夙因
依依殘照落空潭鐘杵一樓花一龕天子殘魂傷杜宇
美人末路證瞿曇拖愁入水風前絮裏夢成絲繭內蠶
偏是相思抽不斷蘼蕪又綠古江南

車轆轤行

一老婦爲馬車所軋死余目擊其狀賦成此詩
車轆轤馬躑躅鞭夫嗔老婦伏婦號一聲不遑哭鞭夫

一叱血流漉馬蹄蹂躪鼻耳目車輪劈裂骨皮肉一車
載者半如鬼挪揄不顧老婦死馬飛倏忽沙成煙陰風
吹火冷于水君不見白楊蒿里淒以哀藁葬無數枯骨
堆人生自古皆有死爾獨吞聲吁慘哉我歌悲惋我淚
滂沱行人酸鼻其奈爾何夜來風雨杜鵑熱路旁魂魄
春草多

蔡文姬歸漢圖

天遣妾身遭亂離胡笳十八不勝悲歸來一片舊明月
又是銅人辭漢時
苟活終留失節名甘從三姓若爲情當時身葬黃河水

合聽胡雛喚母聲

不如歸去辭

不如歸去不如歸去杜宇催春去何處是南是北是東
西萋萋綠徧蘼蕪路蘼蕪卻憶舊王孫杜宇偏傷古帝
魂不能歸去空爲鳥苦放悲聲勸別人空舫灘上殘月
黑無衣游子心淒惻湘江別有鷓鴣啼爲報一聲行不
得我獨不知行路難乍聽杜宇出門看桃花一霎吹紅
雨新綠簾櫳有暮寒春來春去太無賴可憐煙景濃于
畫勿共莊生曉夢迷且須消受詩人拜我欲招之魂有
無帝子帝子歸來乎嘻嘻東西南北游戲耳胡不化成

蓮蕩魚

擬唐人樂府

蘿老松有衣松摧蘿無依寒蟬抱枝哭落葉辭樹飛妾
昔無子如調飢妾今有子還別離子生公姥樂復樂夫
去妾心悲莫悲傷心空折古楊柳回頭卻憶天桃枝桃
花灼灼于歸日楊柳依依乍別時妾銜石闕石欲裂君
唱刀環刀亦折隴水西下笳聲悲關山同照長安月長
安月幾千里是征人心思婦心一齊吹入秋風裏無端
驚起烏畢逋牀頭還有兒呱呱不堪瞻望城南隅昔采
芣苢今靡蕪

春末夏初墨上即日

招招舟子若爲情我與寒鷗是夙盟尋到夕陽芳草澹
乍吹人影暮潮生春殘未必無些恨花落何曾有箇聲
一片江煙青不了垂楊圍水笛枝橫

勞勞歌

鐵聚六州石錮南山禽填東海之三者陷於死而後悔
嗚乎悔何及徒勞勞海枯石爛鐵不牢我猶欲負鵬翼
登青天鴻洞塵影齊州煙浩乎極望幾千里白日飄墮
西山巔我豈愛浮生不欲入醉鄉裏未聞醉鄉之樂長
如此劉伶荷鍤死便埋僵屍奇臭而已矣我豈惜黃金

不欲買美人笑未聞襄王朝暮夢不覺碧鬢十二雲濛
濛楚魂雨哭一破廟勞何其勞何其我所涉兮水莽蕩
我所跋兮山險巖書生原白眼孔大區區此願將之奈
勞而不悔心成城石牆鐵壁誰能破嗟嗟石牆鐵壁有
時破

猗蘭操

猗彼蘭兮日暮天寒于以采之空谷之間 猗彼蘭兮
維香揚揚于以采之溱洧之旁 蘭在溱洧衆草蕪穢
雖香其揚狡童之愛 蘭在空谷孤芳獨立雖天其寒
君子之揖 蘭之猗矣王者之香天之寒矣君子之傷

云何傷矣狡童之狂

小病無聊閱明季雜史得六律

乍歌乍哭髮衝冠如此興亡良可歎帝子弱魂歸碧落
美人詭計進紅丸清流猶且爭朋黨濁亂真難責闕官
委鬼頭飛茄蔓斷誰知既是局闌珊

玉匣珠襦夢一場可憐慵髻學啼妝斑斑紅淚唾壺熱
瑟瑟秋心團扇涼露溼螢燈吹壞殿蜚寒苔月照陰房
西施何幸五湖葬不值煤山風雨荒

是峽猿聲棧宇聲蜀王殿上鼓鼙鳴童謠偏管賊長短
廟議謾爭功重輕高屋建瓴無一計覆巢完卵豈孤撐

曉來滿地干戈影春草如絲血亂縈

烏紗紅袖兩傾城又學齊梁癡絕生只有秀才爭結社
不聞天子愛談兵春寒露井墮明月花謝鈎欄啼曉鶯
誰信酒闌鐘歇夜離離北斗照空營

漏箭聲沈蠟淚斜荒雞忽報走鋼車滿街都督窮如鼠
千騎旌旗亂似麻悲嘯守城惟戰鬼哀鳴戀闕是宮鴉
那知更有無家雁江上秋風怨暮笳

天桃弱絮命飄搖猶伴秦樓人姓蕭古苑燕脂凝角井
舊都宮闕化團瓢蟬無一語夕陽下蝶有雙魂花影招
卻是便宜爲乞食王孫夫婦慣吹簫

苦熱東諸同人時痧病盛行死者日數百人

赤帝啾啾乘日輪其威赫灼暴於秦酸文吞淚悽招鬼

時陽曆中元

毒蟻銜沙熱觸人微有風漪搖白藕漸吹魚沫度

青蘋樹陰牛喘能蘇否纔是南軒午夢眞

和橋本蓉塘 二首

不須埋首亂書堆磊落有時歌莫哀擊筑今存燕市客
披襟笑上楚王臺一生同調君而已吾輩窮愁古以來
所慕前人然諾重交情滯在手中杯

謝家錦繡自成堆休學江關庾信哀謾把藥煙顏鏡閣

君難多病君亦夙病未痊因名所居室曰藥煙閣蓋效清黎二機故事也

合依麴壘築妝臺露華似水星流去

紈影隨人月照來那得乍涼如此夜與君促膝不停杯
浴後涼甚戲代人閨意仍用前韻

蘭湯浴罷鬢雲堆何處忽聽簫管哀餘響遙傳新水榭
涼聲微漾古琴臺荷心得露吹香散蟲語移秋入戶來
欲把冰紈捐篋底流螢影墮夜光杯

接到蓉塘連篇疊和余才澀氣沮已豎石頭之旛
矣忽聞朝鮮變報慨然有所感又疊一律時壬午
七月二十九日也

倒卷旌旗入浪堆調言頓使我心哀中興功業凌煙閣
末路英雄戲馬臺可惜良臣成賊去又聞狴狗血人來

滿腔屹屹悲歌激磊砢難消酒百杯

是夜月色甚明撫今思昔百感交集因拈南宋稗
史排悶乃題其後

杜鵑紅血濺龍堆紫塞燕支有暮哀宮女飄零辭北闕
遺民慟哭上西臺月篩寒竹經聲出潮打空城雁語來
最憶六陵殘照路冬青醅酒淚盈杯

星河七月謠

星河茫茫東方西方南北方箕舌之侈星河之水可以
簸揚斗柄之揭星河之水可以成酒漿彼睨者牽牛星
河之水瀾不濡車箱彼跂者織女星河之水漪自成文

章星官分影萬古星河旁白榆歷歷羅列三三兩兩行
光燄萬丈如劍芒一解維秋七月天風吹涼倏有白躡之
豕丞涉波月離于畢天變黃雲浪浪雨滂滂雷殷殷鼓
鏗鏗泌泌牛渚激湍乃揚沸湯嘽嘽河漢小星乃譟蜩
蟬斗柄欲折箕舌卷入喉空俵俵牽牛織女口噤目眇
驚且僵二解星槎欲前不前濁浪搖危檣檣烏影墮龍旂
波底翔鳴乎臣等二十有四人幾葬魚腹一齊仰瞻天
一方銀漢邪紅牆邪隱汨者帝鄉邪三解夜未央晰晰者
何庭燎之光帝乃星言夙駕鸞聲鏘鏘日咨爾孤臣且
莫倉皇蠹茲蝨賊豈能披昌須臾有杲杲一輪紅日出

自扶桑乃使西彼星河之水朝宗于海流湯湯嗟哉反
噬成天狼胡不學附驥中山王四解

秋詞

約伴南園鬪草時一雙蝴蝶步相隨而今冷澹秋魂小
猶是斜陽影不離

西風瑟瑟雁南征流水年年別恨生日暮蕭條江上柳
誰家離笛又邊聲

明月刀環古藁砧試將隱語細思尋蓮儂梧子酸鹹外
別有芭蕉展轉心

霜白西鄰古井闌依依月落屋梁端何來絡緯一聲苦

篝火絢絲貧女寒

髮繡淨土曼荼羅諸名流題詠殆徧余復何言戲
題四截句于其後

竝蕤蓮花連理枝善男善女慧仍癡要知說法太多事
佛亦自縈煩惱絲

髮本非絲怎翦裁菩提非樹鏡非臺誰知妙手僧空念
幻出空空妙念來

愛獄情牢人自迷迷師爲示大菩提有緣一切凡夫種
結髮三生法喜妻

泥絮本來清淨身連環鎖骨幻非真慧心不拾人牙後

有髮情僧有漏因

秋懷

山月何蒼蒼青楓嘯猿狖下有哦詩人淒寒薄肌透學
作楚吟咽容似食蛙瘦仰屋疑仰天星光滿罅漏木落
栖烏驚鐙滅鬧蛾救豈無牛衣妻顧影泣相守商飈忽
無聲秋凝古井盞一絲蟲韻微疏籬露如豆

自題深草秋填詞

詩人零落也風流譬若宮娥白了頭子夜古歌涼鈿笛
星宵新夢冷香篝桃笙吹露幽花泣梧井無波澹月愁
儘有小詞如落葉微吟聲墮一蟬秋

偶作

我與豐公同故墟前村牧笛夕陽疏如今一事無成處
卻憶兒時不讀書

秋思古意

一劍買來恩與讎黃金臺下淚空流哭聲在野慘生別
苦志出門懷死憂敗馬天山人沒雪枯桑海水月知秋
男兒憤惋復何有慷慨不如秦女休
落葉辭柯暮雨潛飄零客子不能還蕭蕭柏老古陵上
激激水流盤石間贈我何惟蘭蕙草別君乃到雁門關
此時揮淚一回首殘照燕然山外山

客路瞻雲天一涯依依親舍夢中知斗箕南北此焉別
萍絮東西安所之月在轆轤心照水人如蒲葦淚紉絲
明朝又聽黃河咽聲是爺娘莫謾悲

蟋蟀鳴悲草露團杯深酒濁涕洟瀾及時我亦須行樂
來日誰知是大難幾處西山采薇苦何人中野履霜寒
天無罅漏地無陷可有人間忠孝完

孔雀東南行題揚州十日記後

孔雀東南飛不去五里徘徊一反顧西北高樓半作灰
而今日斷秦淮樹秦淮明月秣陵秋一水盈盈河漢流
白髮老伶仍入選妙齡天子最無愁桃葉新歌柘枝舞

霓裳法曲淋鈴雨若使惡聲無夜烏誰知殺氣有鞞鼓
鞞鼓聲譟揚州城廿四橋上煙塵生鑄錯空歎六州鐵
操戈本是同室兵堂堂四鎮爪牙士閱牆甘作蟲沙死
堪嗤賊孽番山鷁可惜將材黃闔子局勢一變闌殘極
隻手江淮障無力鐵騎北來胡角哀孤臣痛哭戰袍赤
曰臣可法死臣職願庇城中生靈百千億維時乙酉四
月廿六日日無色月亦蝕去年煤山旁萬乘悲倉皇紅
鵲銜血貴人哭黑風卷雨流賊狂乃今愁遺福王一終
致破國何餘殃君臣六代豔殘粉板橋五月飛新霜故
巢春燕舊主換別宅秋鴻斜照涼衣冠獨有嶺頭月梅

花一枝吹冷香君不見尙書西北孫傳庭閣部東南史
道鄰一樣忠魂不可泯哀哉尙是亡國臣

秋夜雜吟

榻來大笑我清貧戶有網絲氈有塵半夜蟬吟詩共苦
一生鐙影婦相親因緣烏鼠憐同穴浩劫蟲沙笑小人
何日化爲猿鶴去故山好卜薜蘿鄰

書客秋蓬感百端吞聲躑躅欲歌難四無人影月直入
下有蜚鳴風以寒身外榮枯桐瑟瑟夢中窮達夜漫漫
星河已轉笙聲徹何處高樓酒未闌

挑燭蕭齋讀楚辭無愁可遣又吟詩秋風嫋嫋魂來些

春草緜緜夢見之，紈扇入懷猶棄我。
馨香盈袖欲貽誰，女蘿悔作鬼衣帶。
幾日曾依松柏枝。

秋悲春恨兩無憑，節序變遷偏不勝。
征雁聲高河漢月，黏螢光死轆轤繩。
摩挲淚眼看孤劍，凝聚精神有一鐙。
聽到三更鐘杵響也，憐寒煞破樓僧。

眼前無物不傷神，休怪詩成意未伸。
雁似飢民嗷遍野，蟲如棄婦泣依人。
青蠅點污才名誤，白骨撐持姓氏新。
枉自孤吟答秋雨，誰能識曲聽其真。

雜述

意匠經營何所求，甘拚自晦也千秋。
坑儒我愛秦皇勇。

雨粟天憐蒼頡愁，石鼓缺支煩鬼護。
竹書荒史紀堯囚，信疑相半古如此。
誰復苦將同異搜。

反箜篌引

箜篌引朝鮮，津卒霍里子高妻麗玉所作，即樂府所謂公無渡河是也。今倚其聲反其意以送木下梅里。

真行 赴任朝鮮

公平散髮凌滄洲，涼波如星點白鷗。
飄然一葦此中去，拍手大笑煙雨收。
眼前指顧何處是，半壁混同江水流。
兔山脣缺斜陽補，鹿島秋寒落葉愁。
落葉打人雁悽切，行行重憶河梁別。
折盡垂楊千萬條，一時望斷長安月。

公平長安多故人詩酒風流文墨親由來將相原無種
似此遭逢更絕倫浮槎雲漢新星使簪筆蘭臺舊史臣
但使文章藏虎豹何須臺閣畫麒麟君不見檀君祠下
風森肅虎爪痕斑腥草木又不見平壤城頭鼓角殘瘦
馬嘶月空濠寒豐公遺迹無人弔箕子孤墳有狐嘯山
河滿日幾興亡黍離麥秀冷殘照公平公乎行其間中
心振觸悲無端古來成敗同一轍絕世英雄如是觀毋
歎滄桑如轉燭我今爲鼓篋篋曲噫嘻東方日出扶桑
紅公平笑度鴨江綠

除夕

年年一例祭新詩今夕擲揄鬼奪之酸到書生衣亦陋
窮如乞丐鼠同飢寒梅鐵笛聲中活破釜黃梁夢後炊
殘醉明朝羞故態春風一笑別經時

去歲年豐酒價高今年穀賤盜如毛已聞血影蝕苔石

謂板垣退助
岐阜豪傷事

又有殺聲奔海濤

朝鮮之變

妖慧光芒猶閃爍

是秋慧星
見東南方黨

人談論儘羸豪掉頭否否梅花笑膽大瓶中鐵石牢

守歲

淒淒重淒淒守歲如傷離今夜朔風厲明朝天一涯餓
爾一杯酒窮賤何所悲葛屨可履霜豈曰吾無衣塵沙
我髮亂風雪我骨斷偃蹇二十年百年一憂患婦曰爲

改歲破屋良可歎
墜戶寒月入穹窿
點鼠竄夜半雞鳴
嚶鐙黑不成日

槐南集卷一

槐南集卷二

東京 森大來 公泰

癸未

錢虞山初學有學集註活刷竣工購一部贈蓉塘
吟侶媵以七律六首

漆室長歎嫁女詞
女貞變作寄生枝
月銜樓榭絳雲散
春入山莊紅豆知
異代冷嘲貳臣傳
前朝疑獄黨人碑
國亡家破風情在
也似徐娘垂老時

水贖山殘亂似麻
風懷牢落鬢吹華
河東名妓王孫草
江左詩人蕩子花
甲帳丁簾寒漢月
西烏南雁慘胡笳

憐君不說滄桑感末路逃禪亦一家

同時俊煞龔尚書腸斷橫波一注初人夢依花吹白蝶
仙妝臨水照紅蕖琴心夜月簾櫳小墨暈疏梅硯匣虛
何似江南吳祭酒念家山破渺愁予

江關蕭瑟庾蘭成旛影依稀記石城永巷長門有苔影
烏啼楓落又潮聲美人入道紅妝換佳俠含光翠袖驚
便道延陵不忘故如何一諾負侯嬴
濯足滄浪水不清出山心事竟難明君王已被燕脂辱
詞客還偷螻蟻生名教罪人良可歎風流宗主洵多情
當時更愧煙花賤猶是鴻毛一死輕

家國茫茫事可嗟詩人今尙說三家暗香春動梅村月
秀色曉餐芝麓霞笑我獨拈紅豆子知君閒讀碧窗紗
無端夢入虞山路吟到蘼蕪夕照斜

雪夜永阪石埭 周 玉池仙館招飲分得寒字

刻燭曾經粉墨殘分箋今復坐更闌月痕澹透古梅壁
雪影微篩疏竹欄詩夢欲仙驚絕豔文心如水敵奇寒
醉來慚我才情澀也似冰絃久不彈

口占

俗了詩人誰見憐逢人只要拜新年不曾一問梅花夢
忽漫春風二月前

春淺門前展齒知有人挑菜雨如絲只憐小草青青徧
憶否霜辛雪苦時

二月八日大雪

昨誇春色在吾家陋巷雖凹幽徑斜後有樓臺前院落
左爲楊柳右梅花夜來酣醉冥冥臥曉起閤浮莽莽遮
推戶模糊渾不辨忽驚檐底墮寒鴉
一時埋了井垣牆纔悟宵來雨雪雩市上酒徒歌激楚
街頭丐婦淚悽惶勞薪冷竈溼難爨破屋古梅寒不僵
知是掃門沽酒去誰家赤脚太奔忙
塔尖滅沒失前峰峰外同雲澹又濃填得地無些缺陷

算來天是大包容春從妙妓懷中得梅向詩人驢背逢
獨有袁安呼不起臥聽山衲飯時鐘

談笑擁鑪鑪火微一家終日掩柴扉逸妻倚竹梅花髻
嬌妹霑泥柳絮衣禁體詩人奇句出仙心鐵笛醉魂飛
無端磨盡少年氣記取南山看打圍

姚志梁

文棟

示其弟農盦

文稱

梅影四律索和同石埭

蓉塘作四首

人言詩思在騎驢我愛寒村和雪鋤流水一灣修竹外
茅堂十笏散花初冰肌冷豔新妝樣月魄空靈古鏡如
清絕暗香浮動處翠禽呼夢隔林間

真身是幻假身仙此意難將畫理傳禪子結跏風磬定
漁娃雙髻雪篷眠呼之欲出香如水來也何遲澹有煙
手展冰綃呵凍筆依依殘月挂前檐檐字出韻
姑從原唱
鐵心能耐乍寒時修到今生悔太遲惆悵臨風人夢覺
黃昏有月水心知春雲縹緲留仙相夜雪嬋娟弄古姿
猶是外邊香漠漠不曾真箇鶴相疑

玉骨珊珊環佩俱被風招出悄如呼月前春證非非想
鐙下寒消九九圖倚竹箇人依舊在敲門或者未全無
何須更問羅浮夢處士孤山已不孤

疊韻四首

欲折高枝誤墜驢道人大笑荷春鋤有神只合傳空際
無物原來似古初笛裏別愁憐杳杳夢中法喜悟如如
夜深驚煞孤村犬寒隔仙雲吠巷閭

冰裳雪佩古神仙合共凌波羅韞傳不與蕙蘭親獨醒
肯同楊柳愛三眠美人贈我以明月處女窺臣如澹煙
錯認撲花幽蝶亂低回重繞淺深檐

四百峰頭獨立時柴門半啓鶴來遲澹將我相分人相
瘦有君知勝自知只恨薄于春月暈可憐本是歲寒姿
同心松柏凌霜直看到橫斜轉見疑

夢裏山童野鶴俱依稀似聽舊歡呼人填琴閣春寒譜

月印苔衣古繡圖竹本虚心分瘦與瓶偏小膽耐愁無
一株更有階前石賴是仙根託未孤

再疊四首

緩緩誰騎雪裏驢瓊田十畝不須鋤春何窈窕月生後
水亦空濛風定初古帳殘魂煙篆在小窗橫幅墨雲如
分明夢與高人見記自湖邊訪故閭

恍訝宮娥戲半仙飄搖相送暗香傳登牆旖旎風前笑
落井依稀水底眠飛鳳翼雙秦弄玉驂鸞背竝步非煙
也知春夢都如霧澹月簾櫳古雪檐

仙鬢笑瞥下來時翩若驚鴻也未遲千古只能君復配

一身之外放翁知奇酸磨盡雪霜骨俗豔羞爲兒女姿
無奈羅帷暮寒入半隨舒卷月相疑

明璫翠羽鎖相俱宜做仙家眷屬呼半面出帷斜向鏡
十眉分月悄披圖比他梨雪寒猶重不是桃花路也無
若有人兮欲歸去霜天曉角一聲孤

哀雁行

一兒爲弟報讎而不爲法所容遂被囚繫余悲其志
爲作是詩

哀哀雁銜魚啼蒲葦冥冥寒水淒淒道旁有兒兒何所
悲兒有父母兒有弟兄弟人殺之一解弟捕魚水之汙獲

魚何多笑容在水旁有鄰家童求魚不得求不已瞋目
 搶弟眾垂泣弟哀跪童曰止弟曰唯童推弟起弟墮水
 死二解父母頓足號啕而哭兒心如剜肉舉手相扶將老
 淚應聲髮為禿千聲萬聲弟不來淚盡成血空漉漉三解
 不報弟仇兒死不休鵲鴿急難既難救何必鳴啣啾決
 意謝父母徘徊河水頭石齒磨我劍秋水光幽幽四解見
 童來日背裂童驚呼劍光掣屠童腸抉童舌赤者童血
 黑者童髮骨肉狼藉童氣絕沙浪倒奔弟魂熱五解網有
 孤雁揚酸嘶兒有父母當誰依弟讎可報兒弗疑官有
 法兒弗知六解

鉤里行

足利義尙孱愚殆過其父義政當其出軍鉤里惑溺
 髮幸沈淫酒色以致身遽隕亡貽笑強敵而世之紀
 錄者傳聞異辭甚則推為足利氏第一名將藉藉稱
 贊不措余初亦以為然及讀大乘院寺社雜事記蔭
 涼軒日錄等書始知事與世傳異爰作是詩而訂正
 之

鏡山鬢影琶湖煙空翠飄蕩朝妻船近江朝妻山故事見雜曲秋風葉下

洞庭口夕陽雁落平沙前琵琶湖有八景做彼土瀟湘故事也因借用雁聲蒼涼瑟聲

死何處急笳咽不起猶道古墳留粟津可憐新月照鉤

里新月如鉤刁斗寒將軍二十始登壇清歌細柳營中
起酣戰桃花馬上看健兒擊鼓皆踊躍夜半啼烏在楚
幕于役嘗聞行路難遠征翻唱從軍樂到處敵兵無一
人但看滿日昏煙塵慘慘生囚多婦女纍纍死馘半黎
民黎民痛哭將軍笑選舞徵歌兩精妙夜月迎來桃葉
舟春風放出木蘭櫂旌旄又有馮子都錦繡照耀輿臺
軀有時宛轉鄂君被有時調笑酒家胡迷離撲朔日荒
醺三年不見一征戰偏覺及時行樂多庸知轉轂豪華
變大樹飄零看欲空後庭花影尙情鍾銷魂春醒一場
夢催命暮敲三井鐘鐘鳴漏盡笙歌歇中天星墮夜無

月滿營誰是淚霑衣只聽辛崎雨淒絕是夜魂魄嗟渺
茫明朝劫火驚蒼黃將軍死前無跋扈狡童身後猶猖
狂嗚乎將軍多豔福不如兒女有收局琵琶終古湖波
涼至今人鼓朝妻曲

紫月篇

浪華觀象臺報三月十二日夜月光乍紫賦此志異
赤脚仙人踏天裂笑丸紫霞鍊明月月光凝紫星變紅
蟾蜍似銜杜鵑血瓊花暈透春濛濛紫鳳雙驂如夢中
廣寒宮裏騰寶燄桂香陌上揚彩虹姮娥一醉嬌無力
豔同王母蟠桃色又疑漢殿朱瑛盤放光直射紫微側

紫鴛影隻誰共偕紫玉成煙冷似灰碧海青天空悵望
人間誰奏紫雲迴

上巳姚志梁招同諸名流修禊墨水酒樓兼補祝

小野侗翁前輩

長恩

七十壽六首

流鶯喚人催曉起啼入澹黃楊柳裏煙繞蕩碧花簾紅
盈盈繪出墨江水墨江三月芳草新終古秉蘭多麗人
今年更邀修禊飲抵得樂游原上春
笙管繚繞歌絲涼漾在曲水之中央白袷少年齊拍手
縠紋風皺如流觴水光上衣草同綠幾處香塵漲鈿鼓
誰如亭子日以蘭四有茂林有修竹

滿坐六朝古裙屐笑邀山影酒中碧楊柳煙圍罨畫船
桃花水蘸流霞席永和以後無此游不藉詞賦猶千秋
況又淋漓留醉本明朝直登文選樓

游絲吹春春欲裊裙腰青青蝶縈草酒觴偏憐紅雨多
茶簾卻愛綠陰好銷魂誰似王阮亭唱斷冶春空復情

那知詩成嘯傲處上羅星斗聽緜笙

事見冒辟疆水繪園修禊記是日
志梁有效漁洋冶春絕句十二首

緜笙引鶴風飄搖步虛吹下王子喬瑤池醮後幾千歲
又見玉女擎靈桃春雲也似介眉壽空濛忽現前山秀
式瞻此會古亦稀人間觴詠合仙奏

水妃羅鞵來何遲白鬚仙客扶醉歸一江脈脈復濺濺

新蟾挂在垂柳絲隔江殘笛破煙景何日重來放春艇
桃花粥熟櫻筍廚題詩更問古梅影

席上諸人皆舊和姚
農齋梅影詩者故云

憶田園曲九首

不聽啼鶯不聽鶻當門柳色已如煙偶因坐雨聞蛙鼓
忽憶新秧綠徧田

廟鼓坎坎社笛譁春來行樂在田家華堂公子知何苦
祇解尊前奏落花

插秧是爺提饑娘大婦中婦秧歌忙風吹小妹羅裙動
笑倒鄰家第二郎

鶉鴣啼處草連天未霽先耕雨後田新婦新郎泥滑刺

出泥時露大金蓮

半笠斜陽自擺搖與郎同種有情苗一雙健脚多風趣
不信君王愛病腰

采桑時節又新晴攜取傾筐約伴行一事要防使君馬
兒家本不解彈箏

新蠶昨夜大如眉剛值初三月出時月子問儂年幾許
除非夫婿不容知

俚語云月子年幾
許十三又加七

說孝說忠終誤身空談笑煞讀書人誰知醇朴古情性
只有愚夫愚婦真

雨打殘花苔上垣無聊又賦憶田園微吟試與山妻聽

滿鬢春風笑不言

久不晤蓉塘吟侶聞杜門息影與病爲緣有此寄
纔掃陰廊苔便深一春殘夢共消沈被錢賺出酒人淚
將鐵鑄成詞客心史筆每推君獨詣詩筒定答我孤吟
著書幾日知終業問自何時病到今

烈婦吟

烈婦名喜和子館林藩士岡谷繁實之妹也元治慶應
之際國論喧騰君夙唱大義勤勞王事頗中權奸忌
得罪下獄而烈婦所嫁固非其偶遂以見疑飲刃而
死大學教授飯田武鄉有紀事一卷事詳具焉余讀

而悲之作烈婦吟

匪可撥者天上月匪可奪者匹婦節月光蔽虧尙可盈
婦身一失豈能潔鬱彼澗頭松柏枝秋風日暮聲何悲
蟋蟀一朝抱之死菟絲千歲縈不離菟絲也似浮萍影
那識妾心如水冷荼苦薺甘二十年紛紛恩怨從頭省
燕雛辭母始雙栖自知嫁娶不須啼每羞蜀郡王孫女
所慕廬江小吏妻雞鳴入機不會息挑鐙時侍舅姑側
幾開鸞鏡看嬌容但恐蛾眉有恨色忽聽一聲銅角哀
風雲變色慘黃埃劫抵紅羊黨碑出謠如白雁墨夷來
幕議因循朝命下提戈誰是勤王者星芒夜閃紫宸宮

月影秋荒武藏野藩廷水火空蹉跎妾兄一劍三摩抄
奮身要爲官家死氣節如山折不磨南冠竟與楚囚伍
寧知妾身亦受侮不遑恤後只吞聲瞻望兄兮泣如雨
今皇登極王業新眷顧又及孤忠臣餘生幸見太平土
殘喘免作流離民舅姑歡笑復依舊琴瑟重諧故仇偶
豈意鼠牙穿我牖謾傳牆茨蔓中菁蔓草滋蔓眞難圖
口銜石闕空悲吁不恨才人嫁厮養忍令棄婦唱薜蘿
春風旣短桃花命自此飄搖誰與證痛絕菖蒲蕩子憐
冷看芍藥狂且贈蛇影見疑何用歎冤禽填海本非難
傷哉不得兄一面中腸惟此如循環刀光逼人風四起

淚背一汪血凝紫正逢太歲庚辰秋八月十三伏刃死
嗚乎魂去屍長留萬古千秋土一抔其前松柏自盤鬱
上有螻蛄啼啾啾嗚乎烈婦貞而烈月出當心皓以潔
人間天上相映輝婦節無虧月無缺

演義日本外史平氏卷題辭爲松村春風操作

蝴蝶飛來欲怨誰一羣嬌鳥亂啼時花如春夢朝雲散
佛有秋心暮梵知醯甕旁嘲傳隱語鐵琶急響唱盲詞
才人偏慣憑空撰不到荒唐文不奇

山圍故國笛蕭蕭嗚咽寒江上下潮御柳錦帆新水調
縶孤箕服古童謠叙平氏騶奪取敗之由筆意全學漢
土小說東周列國志隋唐演義等筆依舊樣葫蘆畫

酒借他人磊砢澆謾說興亡如轉燭帝魂可有楚辭招
妙筆全分班馬香只應癡絕老山陽被人尋出好題目
隨意演來新戲場藤橘源平如傀儡淨生丑旦儘郎唐
一家史似一池水自有春風漪作章

日枝祠神絃曲三章

皎月團銜青山華日日麗赤阪鐘歌迭奏鏗皇皇神煙
容裔星之岡振振鷺下朱衣魚雅神之弔矣飄風吹馬
崇牙樹羽酌壘獻罍醉言胥樂顏如渥赭時皇聖明孕
虞育夏神貽多福烝民受嘏

右神絃正曲一章

雲軒戾止曙霞出海月御反止夕霧凝彩神來神去于
擊靈鼓前導風趨後從雨舞惟聖格天於萬斯年神降
遐福衆庶皆全天上歷歷種白榆人間燦燦鑿聯珠鏡
聯珠兮神點首千人萬人一醉俱

右神絃別曲一章

車班斑花團團童男羅舞蓬萊山童女箱出青煙鬢或
有蟲魚有禽獸笙簫鼓笛拉維奏神武功日本尊白
虎青龍相左右古者人心皆至誠不聞淫巧瀆神明知
今要博神歡喜但道費財神有靈車輪慢舞衣亂牛有
涕人有汗

右神絃變曲一章

銅日謠

八月三十日日光如死魄帶鏽銅色余前有紫月篇
故作是詩以配之

白日輪入丹鼎中黃帝鑄作荆山銅義和敲之若槩木
玻璃色死無玲瓏蚩尤大笑作大霧不晝不夜天鴻濛
是時人間早既甚暑熱如燬憂隆熾乃知造化謔而虐
伎倆愈出奇無窮先生見之未呵壁旁人咄咄頰書空
或云漢廷治獄吏爰書鐵案新疏通昊天何事助姦宄
飛霜六月將毋同或云博望使西域鑿空徒奏河源功

發言盈庭誰執轡况又既失良眩忠或云匈奴耽虎視
或云南粵并兵攻堯堯搖國止止談何容易論不公
由來休徵無可卜勿怪天亦爲瘖聾君不聞夔牛鼓震
八百里熊羆哮嗥龍逢逢容成君轉翠華蓋常伯左執
烏號弓又不見竹聲吹裂嶰谿谷指南車影過天宮八
風應律鳳凰至大螻大蟻如羊虹茫茫六合無不有備
僮荒僮皆牢籠日官偶然一失眠杞憂何必心忡忡且
圖一醉夜深矣怪多見少難聽終先坐蒙被壓睡去
鏡當壁啼草蟲明朝兒童笑拍手來報三竿使舊經先
生驚喜推戶起今日相遭真發矇

傳字石經摩古蒼篋底文章長炳蔚壁間鐘磬尙鏗鏘
當時撤瑟忍追憶奠酒重過三禮堂

九日清國黎公使庶昌招同諸名流作登高會時家

君出游余列席末次公使詩韻奉謝兼志感懷

相逢一笑共開顏雲物蒼茫眉睫間遙浦鷓聲來北雁
全樓秋色臥南山同人作集詩宜澹公使將彙列席上
諸人時作一專集達者為

官興更閒知我原非餐菊伴可能有分列仙班

眼底山河霞透光登臨未必歎斜陽延年酒共茱萸辣
嘉夜佩同蘭茝芳獨有白衣為傲客老來金粟學空王
那知今似參差燕留得寒雛傍畫梁家君今秋在身延山為先祖父
母修大道場自爾法華經八卷

風塵容易換朱顏幾歲殘杯冷炙間佳節欣逢上邦土
平生夢見故鄉山半林賸有楓人老十畝能容桑者閒
但未能離年少習黃花一醉笑聯班

澹雲如水帶山光黃葉聲多又夕陽涼雁一行橫朔氣
幽蘭四壁歇秋芳銜杯例擬陶彭澤邀笛誰為桓野王
江左風流今尙在愧吾無筆比齊梁

真間手兒奈事本邦詞人赤人蟲麻呂以下題詠
頗多今茲仲冬與松浦起雄辰男佐佐木耐齋浚諸
同僚游國府臺過所謂真間浦舊地有一祠相傳
手兒奈汲井處井今存于祠旁憑弔之餘得七古

一篇

銀牀井頭夜寒徹銀瓶井底冷于鐵轆轤一轉腸九回
絲繩欲斷尙縈結汲井女兒顏若花春山初曉麗朱霞
寒泉盈勺堪煎茗淥水當門好浣紗浣紗恰似苧蘿路
碧玉那知小家住依草裙腰乍有香隔花鬢影并成霧
凡豔猶羞驚里閭仙姿本合閉門居無奈里中年少子
爭來要繫紅羅裙或貽玉佩或珠簪或鼓求凰綠綺琴
箇儂心緒如絲亂各種恩情比井深即此轆轤轉不得
柔腸寸裂淚霑臆幸完白璧淨無瑕難保青蓮終壞色
願作飛花毀冶容隨風吹散萬情濃不然化出娉婷百

一郎一箇可憐儂不可雙栖難獨處人間爲女亦何苦
欲向青谿伴小姑門前遙接真間浦浦口嗚咽寒潮生
蘆荻颯颯風泠泠一時月墮雁聲黑萬古楓林魂魄青
兒女謾傳斷腸事丈夫別有傷心地我來慟哭登西臺
唾壺擊碎鐵如意而今日暮此經過蘇碑苔井悵如何
前山夕照一回首淚比英雄臺上多

讀空同子集

正聲淪沒不可尋漢魏堂奧詩乃深太白爲門少陵戶
而後克諧風雅音堂堂李公獨虎視碌碌餘子如蜚吟
但惜劃來古人影不知嘔出自家心古詩十九直不野

李杜清真自陶冶蠢夫口歌比興多學士韻言性情寡
同時何郎明月篇鑿開妙悟原天然風殿薜蘿碧繚繞
水亭菡萏紅嬋娟清秀轉嫌姿嫵媚溫柔端遜才雄鷲
軒輕若持公道論終將魄力推北地有明季世誰其倫
太倉歷下不足珍公安而來自創下操戈入室何紛紜
空疏藉口罕中窾瓣香我已右肩袒誰知鐵笛飛一聲
聲聲似恨寧王反失身卻笑蔡中郎不及唐家一酒狂
謂唐伯虎曾煩杜老救房瑄指康海今學謫仙隨永王算來此段亦
擬古文章難道猶光芒對山有客酒杯熱琵琶槽淚溢歌
激昂

荆山三章章五句效少陵山江詩體

衝牙蠙珠雜佩琚美哉瑟若璠與璵我有奇貨安可居
荆山一哭萬萬古旁人目是黃金魚

飄風吹動南山石石不可爛上有柏下有香魂弔書客
書客著書乃等身勿道生年不滿百時新文時百集告終

蘆中窮士心茫然要路高足津無船嗟嗟何處相資緣
葛生所蒙只荆棘野有蔓草如遺賢

農夫哭

年豐米賤而農夫有哭者又徵兵之令新下海外之
警益棘詩人感而作農夫哭

同雲黯慘風栗烈一箇農夫哭嗚咽哭聲騰天天見憐
自空飄下一丈雪雪深年歲豐社鼓村笛坎逢逢年豐
米穀賤農夫窮淚更如霰得過且過米賤奈何米賤尙
可兵役苦多千倉萬箱黍與稷晨召暮募兵不足輸租
纔免吏人催點兵早被官家飭大男新娶那忍離少男
零丁瘦無力老婦頓足惟號咷新婦傷心語不得何況
昨夜誼呼傳似道徧地皆烽煙大家倉皇縣爺笑說是
三千里外天

除夕戲作

開煞家家歲暮天先生壁立尙依然鈍工自識難磨壁

姦女那知解數錢

余疏算法一切家務付內人整理

神本可迎沽酒後鬼先要

送祭詩前可憐一夜忽忙過醉欲眠時已隔年

送鬼迎神又掃塵一年陳套一年新苦吟願博寒梅笑
善罵常遭俗吏嗔如我癡狂猶入世漏天靈祕忽爲人
多因厭聽朱門臭買肉無錢酒更辛

鴈雁橫空朔氣涼霰聲纔集雪其雱誰將異域沙中骨
看做他家瓦上霜每聽人言先髮指不干我事也神傷
明朝海日初生處猶見南箕爛有光

三季堂中已歲闌華年如水逝無端材懷杞梓憐樗散
詩疏蟲魚拾纈殘清曲但傷歌者苦微辭豈惜解人難

焚香好祭玉谿集錦瑟揮絃珠淚彈

是日余纂輯玉谿錦瑟詩諸家評註成一小冊附以家君創解祭之星

先生影前

殘燈如豆眼摩抄舊稟臨刪細閱過後世可傳知有幾
今年所作更無多未妨時效頽唐筆或復勝聽優孟歌
笑罵文章真趣絕衣冠雖古奈君何

醉吟喜極欲成癡不似平生雕繪辭在我固為游戲體
是誰自做性靈詩新交竹隱應相許老友蓉塘便自知
好待開年花發底聯吟一榻共銜卮

膝論文傾倒無極其詩以近古人擬之蓋在將士雖吳顧賦之間云

魏南集卷二

高野竹隱尾張人才思勁驚自謂不讀本朝人詩予因永阪石埭訂交促

魏南集卷二

東京 森大來 公泰

甲申

元旦口占

一官酸冷尙新年椒酒香吹五鼓前昨夜愁腸難洗處
車輪如水去朝天
只看松竹滿街新天未全明誰是春閉戶皆成去年夢
出門獨作早朝人
待漏侍臣寒未消早看闕下馬蹄驕定知春在香車裏
有箇宮妝別樣嬌

觚稜初日照龍旂御柳微黃露未晞漢鼓春聲鏗動地
蟄蟲蠟處亦含輝

梅花楊柳一般春任手拈來詩太陳可笑壓為開卷作

年年自戴腐頭巾

余詩每年易
一棄故云

早春書懷送橋本蓉塘赴熱海

滿城春雨曉絲絲綠盡關河楊柳枝草長鶯飛君獨去

烏啼月落我相思記從白傅歌長恨

蓉塘酷喜白樂天長恨歌每酒
酣耳熱背誦如流不差一字

有

此青山忍暫離更憶生平藥煙閣海棠開後是歸期

送井上巽軒學士

哲

游歐羅巴

鄴道元水經注不載九河四瀆以外大禹未治處淮南

王陞形訓乃有八紘八殫八澤怪誕不可問穆滿八駿

之所游蟲沙猿鶴如蜉蝣漢皇錯信鑿空客么麼拾得

織女石扶桑麗日紅曉霞我朝文藻古可誇詩人尙談

秦西術學士乃向歐羅巴齊煙蒼點九萬里鵬程欲從

何說起只問禹貢有此不天風鼓盪吹海水海水清以

漪天寒枯桑知鬢栗忽淒動星斗光離離空城烏啼如

鬼哭黑雲壓幕旗撐持君行矣感之涕漣灑歌以志別

我思安南陸金波何穆穆寶月何燭燭欲問古先生禪

心澹如菊梵音遙自普陀來妙蓮恍現靈鷲麓君行矣

自笑頭不禿歌以志別我思西天竺亞倫幻域蛇摩西

驅蠅蛙聚散以色列慈悲邪和華火雲四射怒潮赤法
老鐵騎淘爲沙君行矣弔古嗟復嗟歌以志別我思紅
海涯紅海之外地中海鮫綃織月珠騰彩玲瓏一碧天
沈沈我所思兮渺無際虹霓龍動百尺橋星漢巴黎七
月標香獅入殿雪滾錦斑虎出圈花盤條薔薇清露葡
萄酒雕玉闌干金線柳郎君白晳婦紅妝燕脂紫暈櫻
桃口人間果有大羅天花不凋零月自圓此際便游衆
香國此時應賦小游仙即今高歌醉酩酊待至君歸酒
不醒杯底茫茫滄海波山河一片蜻蛉影

鐙火讀書篇和家大人倚竹書龕詩

磨磚皎可鏡燒麝氲成煙如何讀書士鐙火長悄然習
儒雖未成學詩爰有年唐風悵蟋蟀楚騷傷蕙蘭杜陵
何突兀茅屋秋風寒太白獨灑脫仙心如飛鸞食古豈
難化即今窮呼天總爲作吟苦抱膝無一歡萱草久已
枯夕饒南陔單嚴親亦白髮客淚空潛潛寄兒一紙書
云過卅六灣蔚藍水遶墓苔徑門不關但有古龕竹仍
傍梅花娟鬪兒讀遺書庶慰人長眠再拜淚連絲歎歎
衣不乾二千卷未了心血詩一編

新柳

生小鴛鴦湖上頭買絲難繡是春愁摻摻忍繫碧條脫

恰恰纔聞黃栗留鏡裏憑誰畫螺黛風前約伴拜蟾鉤
如何誤學傷心樣悔倚東風燕子樓

讀陳雲伯頤道堂集

陳文述字雲伯號退庵浙江錢塘人少有才名以團
扇詩受知於儀徵阮雲臺元雲臺一代名臣邃於經
術乃一見雲伯期以上第且勸之讀書雲伯詩初學
西崑輕豔浮靡沾沾自喜因雲臺之言始有嚮學之
志云所著詩選三十卷文鈔十三卷是為頤道堂集
又有外集十卷專錄其少作戒後詩存二卷即其晚
年詩也

賞音首數阮雲臺文武傳家一代才昭勇將軍寶刀在

雲臺祖阮玉堂官湖北參將屢有戰功家傳其所佩刀呼噓若神雲伯有昭勇將軍寶刀歌 詰經精舍絳帷開雲臺以少司農撫浙設詰經精舍於西湖雲伯又有 拈君團扇詩中妙感比陽關笛裏哀雲臺嘗謂王右丞陽關一即曲取調極高笛為之發 即

我棄捐知己少無端展卷為徘徊

雲伯少作古詩規摹梅村近體則藻麗過之與金匱
楊蓉裳同派一時謂之楊陳又嘗與嚴麗生齊名人
目雲伯為紫鳳麗生為白鷹太倉蕭樊村論者雲伯
之諍友也曾規之曰詩必理足而後意足意足而後
氣格生焉篇終而不識命意之所在是理不足也是
妄作也雲伯因此頗自繩檢遂大變其格

文彩推君紫鳳凰更將同調許蓉裳六朝蕭瑟江關體

一瓣蒼涼婁水香

婁水謂梅村蒼涼二字
古人以為梅村定評

鍊意要兼深有理浮辭

專勿婉成章針砭吾愛蕭郎語賦到閒情枉斷腸

句吳錢梅谿

泳

著履園叢話於雲伯恆多微辭其論

詩有云七古以氣格為主尤須沈鬱頓挫以出之細

讀杜韓詩便見如以張王元白為宗梅村為體雖著

作盈尺終是旁門蓋暗譏之也雲伯嘗刻碧城仙館

詩鈔皆香奩側豔之辭有句云七十鴛鴦同命鳥一

雙蝴蝶可憐蟲錢唐梁晉竹

經王

則酷愛誦之人心嗜

好之不同如此

難從元白廢詩筒萬古江河源自同炳蔚誰能真虎變

空靈全是在犀通未妨宋豔班香手一掃尊韓抱杜風

謾笑男兒太輕薄有人愛唱可憐蟲

七古長篇一以表章貞烈激揚忠孝為主明末諸忠

尤詳如盧忠烈墓沈鬱悲愴字字淋漓自謂為集中

第一真不愧矣餘如沈雲英墓秦良玉屯兵處等皆

詠明季奇女子者詞意哀婉音旨蒼涼純乎梅村蹊

徑也

朱家殘局劇蒼黃慘訣于今說烈皇關外有盧空陷沒

洪承疇督關中盧象昇督關
外時有關內洪關外盧之語

河南無李不披猖

謂自成

樞臣謾恨薦人錯

史筆特嚴驅賊綱

楊嗣昌薦熊文燾為總理大為賊所敗嗣昌不得止自出督師謀以蜀困賊遂有成都流血之慘忠州女子真良玉曰閣部驅賊入蜀無賢愚皆知

之云嗣昌即與忠烈爭和戰之議者

讀到蛾眉奇絕處功勳也合讓紅妝

又有史閣部閣典史瞿留守等諸作皆慷慨激切全力為之一一不暇枚舉廣陵烈女祠者雲伯之所建蓋以祀明季殉難婦女十三人云順治乙酉清兵下江南勢如破竹閣部史可法死守揚州城陷日處士羅經甫妻李氏偕其姒劉氏妾梅氏李氏及義女宦奴婢菊花以下共十三人闔樓自焚世稱滿門烈婦方苞撰其墓表厲鶚作之贊王澍亦有碑銘言其狀頗悉蔣苕生嘗作焚樓行雲伯因以繼聲乃建祠祀

之詳見其所撰祠記

雁門笳響徹天聞梅嶺衣香帶血熏

梅花嶺有史閣部衣冠墓

百萬軍兵

同日死十三人骨一樓焚鉛山詩筆

蔣心餘

桐城表

方望王澍

碑銘厲鶚文還有使君來建祀始知兒女是風雲

陽湖趙雲菘

雲

稱梅村身閱興亡時事多所忌避其

作詩命題不敢顯言但撮數字為題使閱者自得之如臨江參軍之為楊廷麟參盧象昇軍事永和宮之為田貴妃薨逝雒陽行之為福王被難鴛湖曲之為吳昌時殿上行之為黃道周初不指某人某事幾於無所捉摹蓋詩人忠厚之旨自不可不如此論者或

嫌其意為詞掩真所未喻雲伯詩亦間有及時事者如卿憐曲即其一也予初未解所指何事何人既而讀隆慶間雜史叢說始得知其為和致齋坤妾吳氏作乾隆中和恃寵專權氣燄熏天貪婪無狀仁宗即位猶以擁戴自居意頗狂傲帝祭之立命儀成二王逮和賜死詩中所謂黃梁已熟曾無計惟願大家千萬歲已是鐘鳴漏盡時猶誇虎踞龍蟠勢重華親政日方中能補神堯未竟功已升稷契居三事更放共驩殛四凶正指此也吳氏蘇州人小字卿憐善歌能詩詞色藝兼勝和嬖之及和敗卿憐遷徙流離賦感

懷詩十二首以見志云

奴僕旌旄鬼逐追侯門直可接冥司不知縣令何蟲豸

便道宗臣是女兒

和權盛時有山東歷城令某入都求見和一面以誇耀於同寅以三千金賄聞者於其歸邸時長跪門前自呈手版和於輿中呵曰縣令是何蟲豸

亦來叩見邪時傳以為笑柄又嘗於乾清宮演禮諸王大臣多有俊雅者和笑曰今日如孫武子教演女兒兵矣其俚俗如此芳醺欲闌催蠟淚春寒

未動護花枝偶然唱起卿憐曲腸斷鐘鳴漏盡時

趙忠毅公鐵如意歌乾隆以來文人名士題詠甚多

雲伯承其後自然難於著筆乃云嗚乎天啓朝局大

奄肆誰使太阿歸婦寺政柄分持四十孫朝右爭呼

九千歲六州大錯鑄不成一代金甌從此碎惜未親

揮豎逆頭不及朱雲劍鋒利雁門風雪鐵衣寒老死

代州不如意凡此數句真摯沈著峻層頓挫雖於衆中未算出奇然亦鐵中錚錚者

太鴻詩句最清寒直是公之忠義肝予於此題尤愛厲太鴻鐵兮何清寒乃是公之忠義肝鐵兮何突兀乃是

公之成死骨四句朱鳥招來毅魂魄朱鳥宋謝翊擊竹如意招文山魂事碧城敲徧曲闌干從

人牙後繼聲易凡事世間如意難披史試參天啓局不禁痛淚為洩瀾

琴娘曲龍么妹歌雲伯和其友王仲瞿舒鐵雲詩而作也仲瞿名曇秀水人鐵雲名位大興人仲瞿石驪樓詩序曰石驪樓弔琴娘也琴娘天台衛氏女于歸三月鞞鼓南來擁之北去歷河渡淮遂以國朝順治

三年死潤州之甘露寺云云乙酉之際南渡倉皇良家子女被北兵驅遣飄零陌上流落路旁者不一而足如余澹心板橋雜記之宋惠湘卞玉京琴歌之中山女其尤著者也乃琴娘以奇特孤操委身宿草自非一二文人發潛闡幽系之詞賦以計不朽將何以慰其瑩魂鬱結仲瞿之與雲伯以綴玉流珠之奇才傳傷心酸鼻之軼事哀感頑豔至矣盡矣其功德豈小小哉龍么妹者貴州土司龍躍之妹也嘉慶二年威勒侯勤保征苗即白蓮教匪檄調土兵適躍病命么妹率兵馳赴軍門妹年十八身長面白結束上馬出沒矢

石間指揮如意雖宿將無以過軍中比之秦良玉洵
奇女子也事平後勤保欲爲么妹執柯時舒鐵雲方
在幕中將以歸之舒婉言辭卻而意不能忘因賦七
律二章紀之有然脂暝寫蔣三妹歌血請行唐四姑
軍令靜原同處子兵符端合付如姬之句事詳雲伯
詩序及番禺張南山維屏松軒隨筆

從軍算是木蘭心落溷還憐花影沈極浦晚潮寒急漿
秣陵殘月冷遙砧剖來玄女兵符祕變出幽州馬客吟
只惜石驪樓一曲不能譜入卞家琴謂卞

雲伯與宗人曼生通志交最密蹤迹亦最相習同官江

南人稱二陳曼生署齋有連理古桑一株因葺屋其
旁爲桑連理館嘉慶己未二人同客阮雲臺琅嬛仙
館雲臺爲闢別室以爲下榻之地署曰曼雲吟館雲
伯又與琴河畫史畢仲愷善仲愷爲寫行看子十二
幀有碧城選夢燕寢凝香花影談禪諸名蓋效松壺
居士雪鴻小影也西谿山人輯吳門畫舫錄屬雲伯
爲品題頗極載酒江湖之勝後雲伯因蕭樊村之言
深悔其少作凡緣情之什一例刪汰及箇中生刊畫
舫續錄索其詩甚力終不復作故所錄止口占贈陸
曼雲詩一首云

一種古桑連理條天風海水記魂銷曼雲吟館曼雲散
紅豆山莊紅豆么雲伯有紅豆山莊紅豆樹歌燕寢凝香花豔豔琅嬛翦燭
雨瀟瀟那知畫舫重來意煙草吳宮儘寂寥

松壺居士錢杜稱雲伯病中自知其前世爲西湖南
屏山壑庵僧夢中嘗與松壺對榻而臥則香火因緣
或三生石上舊精魂邪松壺工繪事爲雲伯畫雪鴻
小影十二幅上海歸佩珊女史謂雲伯容貌畢肖袁
隨園雲伯因題其小影曰生平知己蛾眉小印蕊蘭
書記蓋隨園女弟子一代巾幗之領袖雲伯亦有女
弟子數十人故云爾又與室人龔羽卿玉展約偕隱花

海花海西谿也梅花萬樹若香雪海故名雲伯詩中
屢稱西谿漁隱或梅花顛正爲此也

白石紅梅種夙根三生自有舊精魂雪鴻小影蕊蘭印
花海冷香冰玉痕何必儀容同飯顆或云風彩似隨園
翰君南壑庵中好他是蒼山一老猿

碧城女弟子如嘉定王仲蘭太原辛瑟嬋金壇吳飛
卿于蕊生史琴仙祁門張鳳卿蒙城張雲裳白門孫
芙蓉陳友菊吳門曹小琴吳飛容錢蓮緣黃蘭卿蕙
卿梁谿華芸卿粵東黃耕畹錢塘汪逸珠顧羅峰吳
蘋香陳妙雲皆執贄門下一時稱閨秀之總匯其中

或有不能詩者為代作一二以入其列頗貽譏當世
琴河女史李晨蘭作秋雁詩極工雲伯為鑄秋雁詩
人印貽之又姬人菅湘玉子婦汪小韞並博學
能詩湘玉有小鷗波館詩小韞有自然好學齋詩及
明三十家詩選其餘姬人湘霞雲姬玉媽等亦皆擅
三絕之名雲伯在常熟嘗修柳如是吳冰仙墓後得
隙地於孤山巢居閣西為小青菊香雲友三女士修
墓竝建蘭因館有夕陽花影樓綠陰西閣秋芳閣諸
稱又修雙玉墓於虎丘且建祠雙玉者吳王闔閭女
勝玉夫差女紫玉也當時韻流皆有題詠從此修眉

史者又添一故實矣

一杯香冢半湖霞小閣桐陰啼暮鴉秋雁詩人新弟子

鷗波書記舊名家碧城妙選蕊宮史雲伯碧城選夢曲蕊宮花
史曲皆為女弟子作者紫玉

雙修吳苑花更與尙書撰佳傳靡蕪綠上畫闌斜

雲伯七律中求神完氣足可以為壓卷者則首屈指

和張船山寶雞驛題壁詩白蓮教者起自元末紅巾

之亂終明一代相沿不絕相傳其經卷則由狐仙所

傳多盜竊釋氏之文以持齋修善為名而暗蓄逆志

謀為不軌清初時自京畿以南學者衆乾隆中其風

稍熄而蔓延至楚豫秦蜀諸省遂有嘉慶丙辰楚北

揭竿之亂丁巳九月遂寧詩人張問陶正由棧返蜀
峽中遇警倉皇避難戊午正月又發蜀入都路經寶
雞驛憂教匪之猖狂憫生靈之塗炭作題壁詩十八
首以寄慨焉船山者問陶之別號也其第十八首結
云風詩已廢哀重寫不是傷心古戰場蓋語述悲涼
義關諷諭所謂言者無罪聞者是戒也雲伯因用原
韻和之句如穴潛青犢妖氛起峽東黃牛駭浪生笛
裏荆榛千帳月夢中砧杵萬家煙平蠻空憶銘銅柱
一破敵何當縱火牛唱罷普黎收虎豹歌中救勒見牛
羊魚復陣奇兵早徹蠶叢路險賊能通皆撫時感事

可備少陵詩史之遺雲伯又有聞道四律筆力殆亞
之其詩云聞道妖氛起禁城調言頓使旅魂驚輿圖
匕首環秦殿烽火甘泉照漢營鄴下任城終縛賊朝
端晉國定知兵留臺多少英流在汝輩空勞肆橫行
回中樂府上陵詩正是雄虺伏莽時不爲微行逢柏
谷竟同遇盜警蘭池宮中已啓銅魚鑰塞外初回翠
鳳旗賴有天人三策在不教返蹕誤臨岐從古貂璫
職掃除本朝家法況良謨豈知小醜潛宮苑先有中
涓啓御廚肘腋恩仇天下少肺腸顛倒古今無爾曹
甘與生成外張蹇紛紛盡老奴帛書魚腹起言妖張

角天公勢最梟豈有仙人青領道致令醜類赤眉驕
星辰芒角垂玄象雷雨飛騰下碧霄生縛封狼探虎
穴論功誰似李文饒此詩亦不顯言其爲何事予揣
摩得知因不厭其煩志梗概于左初白蓮教匪之由
楚入秦也兵興九載然後撲滅其傳習京畿者久而
益熾又變爲八卦榮華紅陽白陽諸名有林清者浙
江人幼爲提督王柄弄童隨王於苗疆久頗解武伎
爲彼教所推尊爲法祖積募銀米家業頗豐遂蓄不
逞之志大內太監多河間諸縣人有劉金劉得才等
其家卽素習邪教者選入禁中與茶房太監楊進忠

等傳教羽翼頗衆因與林清交結會辛未秋彗星出
西北方欽天監又奏改癸酉閏八月於次春二月諸
賊以爲豫兆所謂星辰芒角垂玄象是也又其經有
八月中秋黃花落地語遂附會其說以爲清朝不宜
閏八月故欽天監改之乃邀結其黨數千人與劉楊
等暗約於九月初四十五日午時入禁城起事帛書魚
腹醜類赤眉等皆指之也當是時仁宗西巡回駕駐
蹕白澗諸王大臣皆將往迎之林清等乘間而發分
二隊進太監劉得才導其一隊由東華門舞刀而入
禮部侍郎覺羅寶興率數護軍禦之殺傷相當寶興

急入告皇次子嚴命禁城四門促官兵入捕賊其一
由西華門入者時倉卒門不及闔遂全隊入楊進忠
等引之到尙衣監大行屠害第二首第三首專爲仁
宗回駕及劉楊輩而作旣而諸王大臣聞變皆踉蹌
趨至束手無策鎮國公奕瀨率所部火器營官兵入
凡千餘人魚貫橫鎗勢甚勇猛賊遂披靡橫屍流血
御河爲赤是夕月色皓潔如晝寒風颯栗佚賊匿於
五鳳樓者將縱火突出會烏雲自西北起霹靂砉然
俄而大雨如注賊驚潰雨復滅其火種言雷雨飛騰
下碧霄者正謂此而輿圖匕首環秦殿烽火甘泉照

漢營則想見當日情況宛然在目也越三日仁宗自
燕郊入都下詔以靖人心一時賊首林清逆監劉楊
以下皆就縛即日伏誅云

秋風劍外此奇才滿眼兵戈酒一杯金柝和霜寶雞唱
黃花落地白蓮開從知蠱賊重妖讖本自貂璫包禍胎
詩客別揮憂國淚曾經再拜杜鵑來

雲伯以乙科出宰頗究心經濟尤精於水利丙寅年
試吏皖中鐵梅庵保檄之襄治河之役次年春濬河
雲梯關河復叙勞改官江南庚午三月詔以頽年淮
黃多患恐致誤漕飭令籌議海運之法試行雲伯乃

因阮雲臺成議擴張作六十條上之大爲衆議所排然閱十餘年而終見施用又有丙戌南河議青村開河紀略海運北壩高兌議上李書年觀察論黃河不宜改道書與友人論不宜引黃濟運書等數十篇皆切實明暢可見諸行事論者謂近世明習河務所見遠大無如雲伯者而浮沈宦海三十餘年以其境困而才屈未能大用爲可惜子斐之能傳家學所爲西北水利議凡二萬餘言亦深裨于時用斐之字孟楷又字小雲幼聰慧才氣殆過其父著有澄懷堂詩集年三十有餘卒雲伯作斐之事略及詩二十一首悲

之云

陰雲漠漠雨冥冥雁戶流亡那忍聽上議偶因籌海運

按圖便欲註桑經

謂水

孟門濁浪龍難畫瓠子秋風蠙不

靈贖見垂楊空慘綠無兒伯道獨飄零

雲伯晚年頗愛學仙遂能以儒理證道緣由道緣入禪覺專主三教同源之旨自謂學道修德積功累仁可以超生天界嘗客游漢上共羽流數輩閒話黃鶴樓故實系以小詩次夕夢二客過訪一輪巾羽扇一羽衣腰玉笛皆疏髯修貌神彩奕奕羽衣指綸巾者曰此費公也言畢各跨一鶴飛去既寤則作黃鶴仙

人歌紀之一時傳誦和者甚衆其事固太詭異明出
矯託然嗜好之所在可以見矣其詩二十五六卷以
後大抵詠仙蹤佛迹者十而八九雖務以李青蓮爲
宗然詩格則既落第二義戒後詩存二卷尤無足見
者不得云非江淹才盡也

在昔君家說睡仙至今夢蝶舞蹁躑黃梁熟處登黃鶴
紫誥修成入紫煙嘔血惟詩留後世還丹有路悟先天
遲回仍倚梅花影漁隱家鄰葛稚川

晚年作惟文丞相鐵如意歌稍爲可見然語意多與
趙忠毅公歌複全因老境頽唐隨意拈出不復加檢

點其中有云君不見竹垞集中詠公硯淚痕墨瀋空
淋漓又不見樊榭集中詠公琴天風海濤激盪冰絃
絲蓋竹垞有玉帶生歌樊榭有文丞相琴歌余就兩
家集中而熟讀之才思筆力與雲伯相去何啻霄壤
而乃隱然以鼎足自許夜郎王之譏其能免乎
弩末猶能筆力提枯楊此處算生稊文山擊節南人哭
天水傷心北斗低紫硯竹垞痕剝落素琴樊榭韻清淒
近來購得兩家集待我含毫重品題

余幼時隨家君館美濃人戶倉竹圃忱家者凡數月
有書肆以此集求售家君將購之以竹圃請竟爲其

所得家君乃攜外集十卷歸余初學詩頗愛誦之爾
來烏兔倏忽轉眼十歲而竹圃墓草已宿矣今茲甲
申正月家君歷游至美濃其嗣某慨然持此集見贈
家君以余癖好急附書郵轉致因始得窺全豹反覆
吟玩不忍釋手乃搜綴嘉慶道光以來遺聞軼事可
以傳雲伯者數十條系之七律得十五首更次其梗
槩賦一律以志喜竹圃有知亦當首肯云爾

故關夕照冷殘碑養老山前我所思卻拜徐君身後贈
寧無向子笛中悲併將今古滄桑感治作青紅碧綠絲
絲絲不斷是清淚灑向恨天媧石知

余有補春天傳奇紀雲伯修西湖
三女士墓事君嘗蒙節數賞故及

蓉塘養病熱海旬日回未全瘳賦贈

歸期轉在海棠先廿四番風吹未全月氣冰凝前夜雪
花痕霰集後林煙酒須賀監金龜換句要韓公石鼎聯
無奈如今猶示疾香龕十笏只談禪

芳野行宮瓦硯歌爲關澤霞庵

清修賦

春山霏霧銜僧樓不知其下何陵丘一聲似呼奈何帝
花前白盡啼烏頭含淚尙望還北闕行宮佇斷淒涼月
樂府虛傳天馬徠讖言謾註西魚沒欲轉不轉如意輪
寺門殿壁今荆榛野人鑿地土花聚似有熒熒凝碧燐
旁見細泉瀉灌出赤如赭非金盃玉魚非銅駝石馬蒼

鼠竄伏啾啾鳴乃知斷隴蕪殘瓦漢宮云有長母忘瓦名
 依稀記得雙鴛鴦劫灰飛到銅雀上此物自昔關興亡
 矧乃延元際萬乘難自衛倉皇復壁無可為彌留按劍
 空流涕龍髯逆豎天水傾翠華翕歛雲滅明下瞻黃埃
 正散漫悲風滿地皆死聲嗚乎轉瞬五十六年何忍數
 神器無光裂鐘簾爾時此瓦亦沈葬一片尙留乾淨土
 瓦兮瓦兮曾伴瓠笙夜月吹清寥金輪寺藏後醍醐天皇瓠笙兩管又聽鐵鈴
 秋雨鳴蕭騷山陽有興國鐵鈴歌是從何代劉成硯好將磨洗認前朝
 暈如帝衣松露之慘綠纈以將旗菊水之紋縠光如土
 窖燭焰之衰紅鐫以沙場冷箭之芒鏃知當王氣黯欲

無二三毅魄紛騰趨至今呵護硯池影潢水一痕長不
 枯關生新購得再拜忍拂拭展開索我詩始試淋漓墨
 蟾蜍一滴一神傷往事南都渾渺茫墨花片片如瓦裂
 寫作長歌泣數行

新嫁謠

昨日漢宮女今朝新嫁娘嫁得好夫婿同上巫雲牀慎
 莫夢爲雨銅輦春茫茫
 休道朱鳳心不及紫鴛愛所恨嬌蛾眉錯凝翠螺黛昨
 日有人妬今朝有人畫

聞蓉塘病劇賦此以問

吾友蓉塘今陸游射虎山南雪交作少年豪氣未消磨
半世襟懷仍澹泊題詩祇談風月新縱酒何嫌宦情薄
驅使青春入杯底翦成紅霧如圍幕十年聽雨錦官城
一朝臥病蘋風閣藥煙絲裊縈壁溫蓬髮塵梳壓牀弱
更兼蓬鬢憐婦病豈有啼禽喚姑惡溼薪卻勞慈母炊
新衣難教嬌女著此即放翁所不有夫妻宛似雛襟鶴
我聞爲之心悵惘閉門旬日嬾出郭五風十雨一春殘
梅花桃花李花落何時奉君畫團扇旗亭同唱江南樂
柴原議官 和 招邀看梅花席上賦呈
主人醉客此高堂上有梅花倚澹妝四壁生煙仍窈裊

一簾成水但微茫欲憑夜月寫疏影似自酒杯吹古香
好是春寒相護惜笛聲早已近重牆

湖上冶春絕句用厲樊榭韻和永阪石埭

春人愛慣踏青游西子湖頭一笑留水是燕脂山是黛
宛然西子在妝樓

垂柳垂楊絲短長東風吹綠到斜陽怪他春水干何事
偏與么櫻影豔妝

湖心黯澹奈春何山意冥濛欲雨多癡絕滿裙諸女伴
曼聲唱出緩歸歌

往事僧樓話不真白花空照紫衣新夢中卅六雄蝴蝶

都似鴛鴦劫後春

上野東方一帶是三十六僧房故址幕府盛時僧徒競為豪華多著年少容貌俊俏者使著紫衣出入必從世俗名曰上野小姓兼今三十六房皆

為瓦礫而雞皮郭君
獨髮安陽猶有存者

士女釵頭蝶翅翎隨風裊裊又亭亭似憐湖畔裙腰草

要向何人衣上青

雨後煙波晴後霞湖光朝暮已堪誇焚香天女祠頭賽

更禱三春不散花

歌脣銜雨舞衣低不學顛狂絮滿隄無可奈何零落感

花魂仍染井中泥

上野秋色櫻花枝憔悴宛宛可憐石壕押花字韻云地下芳魂招不返夕陽零落井闌花真能替此花寫照余竊推為絕唱

柳橋治春絕句疊前韻

興來便作柳橋游試問三句留不留橋上春風橋下水

旁無楊柳有歌樓

錫簫出巷一聲長早起家家鬪豔陽是柳枝娘新樣髻

是楊妹子可憐妝

南部小伶情奈何眼波拋向箇儂多知他曾見驚鴻舞

惆悵當筵一曲歌

南部借用新富劇場歌妓多以得優伶一顧為榮客歲新橋柳橋諸妓於新富奏伊勢音頭舞石壕作三絕句紀之

鶯語欲流花夢真水光淨綠隔船新夕陽倒浸畫樓影

可有玉郎來借春

往歲石壕寓尾州侯別莊號曰借春居與柳橋相去甚近

前閣簾垂翡翠翎後灣月榭接花亭欲隨雙槳搖情去

春水美人鬢樣青

半裳雲暎半裙霞合做句闌豔品誇珍重三年不言處

如嘆如怨是桃花

謂石隸某樓本事

樓上凝望春色低
郎君白馬近長隄
只須愛惜燕脂土
莫共飛花踏作泥

槐南集卷三

249

53

槐南集

249

53

1944

槐南集卷四

東京 森大來 公泰

甲申

橋本蓉塘畫蘭歌

綉蘭昔聞屈正則畫蘭今見橋蓉塘
 蓉塘沈緜藥裏裏
 不比屈子山澤之徬徨
 豈知素心契萬古
 乃與綠葉紫莖相對揚
 擷英髣髴在其握
 蘭氣墨氣紛淋浪
 臨風乍可佩
 沍露吹芬芳
 宛然遺世而獨立
 恍見九畹連三湘
 湘江西去不復返
 洞庭南望修路荒
 湛湛秋水冷楓樹
 斑斑靈雨啼幽篁
 蘭乎何憔悴
 衆草蕪穢淒嚴霜
 知君

自寫照病葉弱腕難扶將當君循陔采蘭日庭闈眷戀
莫敢違盤桓晨夕慈母側婦乃調膳君奉觴而今婦病
君亦病湯藥親煩慈母嘗此時此恨有誰識呵壁欲問
天蒼茫力疾寫此幅筆墨僑僂仍荒唐國殤與山鬼慘
無一語如秋蟹伊余相對嗟偃蹇猶自服媚空谷香當
門見鋤古所歎同心謬許何曾忘既不能爲君操琴一
曲聲鏗鏘又不能爲君濯足萬里歌滄浪只須長似畫
圖好蘭乎玉體慎自防

黃金白玉篇

夜歸見商家嫁女者妝奩甚盛感而作此

黃者金白者玉黃金爲車玉作輪後有寶奩前有燭燭
華何所照車中有好女雲鬢窈窕光徘徊云是于歸洛
陽賈洛陽三月花滿天花氣蘊作霏紅煙道旁兒女爭
指點皆道如此不羨仙仙家豈要萬金費人間惟有錢
刀貴謾誇嫁時衣滿箱庸知縫者鐙前淚淒淒重淒淒
寒女何須啼作匹雖云晚已嫁永不離誰人還唱估客
樂輶車一去無返時

雜感

問春無語春云暮我代飛花一致詞小夢已非仙子幻
初心悔是女郎癡將風傳信誰爲使有雨催妝祇合知

何事如今輕見棄三更泣別杜鵑枝

萬花轉眄爲黃土一段銷魂又綠陰燕入空簾何所絮
鶯依古柳不成吟卽看風景隨時變始悟詩人託興深
卉木萋萋蟲躍躍眼前誰是細留心

高野竹隱患輒脚疾將赴函山調養旬日賦贈

春盡山雲影不濃行人直指翠微峰落花脚底踏無響
尙隔兜羅繇一重

佐佐木耐齋淡看花小金井經國分寺遺址得古

瓦數片傳觀索詩賦二絕句

千年佛劫歎飛灰殘瓦待君收拾來卻憶風前花片片

無人拈起葬莓苔

此花維昔倚僧房雨打風吹每自傷知否瓦今供賞識
爲曾能耐夜來霜

夏初雜吟隨得隨錄四首

我有孤琴久不彈偶然鼓罷啓窗看草痕綠處天初黯
梅子黃時雨易酸稍覺緜衣身上重尙餘春味夢中寒
誰知絃外音如縷裊得茶煙出竹闌

挂住柳條春一絲夕陽故故欲沈遲落紅瘦似魂離後
新綠濛如夢醒時好向屏山成畫隱那妨酒市號錢癡
醉來更喫人間飯不管黃梁剛半炊

每到春殘百鳥鳴就中苦是杜鵑聲夜深和雨鼓三鼓
晝暗催人程一程今我在家猶欲涕知誰爲客不勝情
天涯芳草萋萋徧定有詩翁再拜迎

少時慣是讀香奩餘緒更將詞譜拈山抹微雲方雅澹
花經疏雨免穠纖情多自信風流甚才減誰誇格調嚴
孤負傳家詩法在被人枉喚小森髯

予十三四時髯鬚者已徧腮下友
人三郊每嘲之曰予爲小森髯

自題松下彈琴小照

松風吹欲颺琴意乍高低明麗夕陽透濃疏新綠齊髻
螺憐蔣妹裙布笑鴻妻偕隱知何日五絃相共攜

絕句

小臣無分賜櫻桃空望觚稜金闕高輦繡天街纖草碧
春光猶染貴人袍

送楊惺吾

守敬

還清國

舊讀廬陵集古錄珠璣金玉陳輝煌近聞毛家汲古閣
華林石室加收藏誰其兼者人姓楊家法奇字窮毫芒
商彝周鼎細參錯經史蒼雅相審詳顧亭林翁厚齋而後誰
頡抗好古直上韓蘇堂瓊籤牙軸苦不足乃搜遺逸來
扶桑奇書千卷盈篋筐瑤華十乘誇縹緗碑版苔篆赤
粲爛纖緯竹簡青倉琅白雲下護霞彩揚似有十丈珊
瑚光天雞一聲欲歸去仙槎縹緲神彷徨嗚乎八極何

茫茫幾人萬里周遐荒謾誇區區枕中祕披函好傲淮南王

湖心亭雨望

近修理湖隄築競馬場
插口常開水枯大半

寺門高接酒旗低微磬出煙聲欲迷林外模糊猶挂雨
湖中獨漉半成泥祇憐魚似吳牛喘不見人歸謝豹啼
憶起年時此沾醉空濛一色水天齊

連日西南風大作書感二首

煙塵全蔽古河湟羞菜生時土不香銅柱掀翻風怒吼
黑旗摧折鬼跳梁莫云海國波濤遠竟是乾坤日夜忙
此際何人歌擊筑西方猛士獨飛揚

安南有羞菜人過以手指之曰女羞
否即時憔悴有羞色人去青如故見

清高士奇
天祿識餘

激浪疑驅十萬兵寧知岸上但空營沙寒戈戟淘無迹
雨急蛟龍哭失聲文武盈廷牛穀餽蠻夷載路虎猙獰
聞言尙聽垂簾政險是僉名謝道清

題江村夏景圖卷

熏風吹徧水邊村戶戶濃陰半掩門銜塔夕陽紅杏渺
縈沙草色碧溫暾煙蓑佇聽新鶻語金甲全銷古血痕
何處干戈猶未歇忍將好景畫中論

大家

大家終日且團欒靜養何心不可安蝴蝶栖花因夢穩

鷓鴣銜葉覺行難寧知窮士非奇福免作悲人勝大官
所愧平生疏嬾性披書一半睡中看

明星爛爛行

并序

寬永遜位承應晏駕爲德川氏兩大疑案室鳩巢小
說載承應一案極悉而寬永則無聞焉余入史館來
得窺祕府藏書始知事不虛傳諸廷臣日記及細川
忠興書簡藤堂高虎實錄等皆出乎親見新聞歷歷
可徵纂輯之暇綴爲韻語凡三百三十六言名曰明
星爛爛行

明星爛爛照宸極百官待漏正屏息內臣狂走簾颯開

蹌踉傳呼帝遜國盈朝錯愕茫不知雌霓忽閃光離披
翠華雲合歸仙洞紫玉煙扶出錦帷殿前早奉長公主
衣裳顛倒紛拜舞是時帝意復何如甘聽淒涼南內雨
中宮獨仰母儀尊上號新宣東福門外家惟炙熏天手
內旨還思敵體恩當初始膺淑女選禁掖流聞誇婉孌
將軍挾制佯含胡便道官家情不淺霄翰屢下綠綈書
盛鬢催登青幃車蜃窗麗日耀霞佩金屋春風吹霧裙
自從册立中宮位專房特承恩寵異長門空閉幾嬋娟
唾壺紅血羅紈淚涼風瑟瑟溝水鳴滿宮幽咽惟吞聲
謾言擲戟刑塗毒豈知啄矢燕輕盈貴驕全仗將軍勢

萬乘悔來已難制骨肉正愁瓜葛連仁慈轉為國家計
吹簫嬴女鳳凰臺躡位天門誅蕩開山河日月皆依舊
秋雨梧桐獨自哀上皇抱恨有誰識三百年來空鬱抑
堪笑關東載筆臣阿世流傳如鬼蜮杜宇啼過古寢園
後來龍種更煩冤至今痛哭晏駕日嗚乎野人何忍言

病中偶占

一幅園池好畫圖倦眸笑我太糊塗荷錢小認魚來去
梅子黃疑雀有無苔氣得煙方欲活石根非雨便當枯
要知經卷藥鑪外病骨還須紅袖扶
芭蕉葉大翠紛紛梅雨淙淙徹日聞拉雜傳將檐鐵語

分明漾作畫簾紋夢邊暖味如披絮病裏春愁似臥雲
剛是內人呼小婢相公被底把香熏

題夢草吟社諸子墨水詩卷後似林春郊卷三

綺語容君斷盡腸散花時節好商量禪栖磬歇濃陰靜
歌榭風生返照涼隔樹酒旗紅半露卷簾煙草碧微颺
無端光景流連處又與雙鬢唱一場

舊雨曾經此卜居關根廢堂杉山三郊門臨柳蔭好精廬依田百川詞人絕調

傳檀板瓜生梅村酒客奇愁晒麴車伊蔭聽秋三月豔陽花自好一時

名俊士無虛即今劉阮津重問須叩春風墨上漁成島柳北

萬古騷人淚灑過我今又到墨江沱葬燕墓上閒憑弔

楊柳樓心正踏歌笛韻於無風處斷潮聲從有月時多
攜君詩卷低回久待與浮鷗問奈何

漫興

長白山雲凝不流混同江水漫悠悠東方日出晨笳壯
朔漠天陰舊鬼愁尙恨豐公空黷武豈知神后此回籌
何時碑勒平漢頌直與燕遼據上游

炎海冥冥瘴氣陰漏天六月尙愁霖沙蟲劫換何由弔
關塞魂歸不可尋猿響如哀巴峽險笛聲終怨武谿深
漢家屬國皆烽火日斷蕭條苜蓿林

蛾賊窮邊又弄戈一朝飛渡乃兒河晉陽鼃竈難爲障

隴上蛇矛枉有歌覆卵不完猶屹立長城自壞竟蹉跎
傷心夜夜英京月白骨閨人夢裏多

海外紛紛羽檄馳風聲到處便狐疑誰云成敗非同轍
未必傳聞是異辭博望侯能知水草元和帝乃屢領頤
本朝家法存神武何敢旁觀局外碁

夏日寓感兼寄懷蓉塘

夢聞鳥語醒尋詩一榻濃陰綠四垂苔影似無疑有際
雲容欲雨乍晴時半舒蕉葉還堪愛未蛻蟬心轉可悲
他日西風蕭械處酸吟除卻夕陽知

故人病骨苦摧殘怕放銅菱枕畔看戒後卻疑忘酒早

夢中偏覺廢詩難醒心證取茶三昧鉢肺縈來血一丸
斷墨零香紛滿壁替君憔悴有幽蘭

漫述

熏風拂柳映彤除云是勳臣授爵初功不必人王玉女
窮猶作士孰華予侯門甲第知非分吏隱頭銜喜未虛
賸有風流傳世在好將杯酒換金魚

小樓涼甚與客分韻賦詩得眉字

山痕欲滴雲收後樹影如流雨霽時併入一樓風灑漾
人人綠盡好鬚眉

黃吟梅超行奉黎公使之命將周游諸道餞飲墨上

賦贈

士女游春嬌一羣花如舞袖草如裙忽聞鶯語頻招我
好唱驪歌此餞君琴韻隔船風斷續墨香滿壁酒平分
碧虛卷盡雙峰影休道明朝是白雲

白雲縹緲繞滄洲笑傲如君洵罕儔才豔句教紅袖索
聲嬌歌愛綠鬟羞簾波盪月猶忘返花氣流煙始欲愁
爲道歸來秋禊節菊杯重醉木蘭舟

吟梅妙解東方音律能度時調
數曲是日攜來兩青衣侑酒

拈李杜詩集戲書其後

飄飄李太白一醉百篇豪天寶詩名諫建安風骨高仙
塵波上捉月影酒中逃悔似平陽妓春寒賜錦袍

堂堂杜拾遺竟是野娘姿
臙馥殘膏在亂頭粗服宜無
鹽誰刻劃末派豈攀追
我索嫣然笑天寒日暮時

漁洋山人精華錄惠棟註本
少時展玩未能終卷
今茲甲申長夏無事暇則披閱
以八月朔日始得
告畢因賦長古一篇題其後

於文人仰桐城方於詩我服新城王
一代正宗才力薄
此語更愛倉山狂帶經堂集九十卷
披閱每嫌太浩瀚
要識山人面目真精華惟此思過半
明湖秋柳紅橋春
醉壁香吹歌扇塵官舫銀鐙情自治
朔鴻關笛怨仍新
是時山人正年少色絲彤管揚鮮耀
非關刻意學傷春

豈獨銷魂誇絕調劍外西風晚照殘
槐花黃盡馬嘶寒
沈思忽往空舫水一字真如蜀道難
句險方知用心苦
除卻杜韓誰共語只因愛讀左司詩
一時愁絕對牀雨
寒鐙蕭瑟記彭城白髮頽瀆無限情
往事風流傷頓盡
舊衫涕泗覺交橫

阮亭西樵兄弟尤友愛計改亭都似眉山二蘇西樵有詩云牢落彭城意
經時涕泗零今宵鶴柴雨猶喜對牀聽阮亭方自蜀道還聞母夫人訃奔

喪歸里明年西樵以哀毀卒
鵲鴿原斷秋聲變那耐更傳悼亡怨
潘岳挂容
塵欲昏阿灰簾影雨空卷可憐酒渴夢殘時
斷墨零紈
筆一枝宛是王維方丈室破禪寫出畫中詩

隔西樵卒三載阮亭
室人張氏卒於家
詔書忽下祭南海浴日亭邊麗霞彩蒼梧縹緲帝妃迎

匡廬鬢髯山靈待夕陽回首白門橋只有當年殘柳條

即看生意婆婆盡也似金陵王氣銷烽煙已撤滇南戍

是時吳三桂之亂始平

秦關蜀棧重來路知君老境漸頽唐三郎昔日

郎當處

阮亭再使秦蜀得時繞百餘篇皆寥寥短章無當年蜀道南海豪放之格

知己誰推獨角麟謾將清秀

媿于鱗華嚴樓閣一彈指面試終憐曳白人

錢牧齋贈阮亭有勿以獨角麟憐彼萬牛

毛之句情秀于鱗是吳喬語彈指華嚴是施閻章語初阮亭之入翰林實由大學士張英推薦康熙帝亦素聞其名召入大內出題面試之阮亭詩思本遲澹加以部曹小臣乍到帝前戰慄極軀竟不能成一字英代作詩

草擬為最九置案仰阮亭得以完卷因之深感激張英終身書贈大曰是日微張某余殆作曳白人矣

何況江淹夢醒後嚴家別才

難藉口始信倉山語不誣違言休獨談龍咎笑余經術

未曾窮望谿文法末由知平生展玩精華錄夙慕山人

海鶴姿今年長夏正苦熱吟聲出竹涼乍徹不辭身臥

簿書堆枕中恍話空山雪

阮亭官司農以廉潔自動嘗答淄州唐濟武簡討書云少無宦情又口不習言阿堵物雖日在錢穀簿書堆中不曾

空山雨雪燒品字朱說無生話時也其高致悟澹如此

哭橋本蓉塘

白日黃雞唱幾回訃音到手始悲摧豈真奪得斯人去

願早呼醒我夢來神定猶疑書未確眼昏爭奈淚先催

踰踉哭向青山路只有蟬聲滿耳哀

藥鼎煙中共唱酬剛纔三日便千秋憐才本自人間事

作賦那關天上樓死別一棺終欲蓋生逢半面也難留

彼蒼蒼者知何意不忍教君到白頭

七載交情抵海深細思無物報知音惺忪淚是睇前露

嗚咽聲如碎後琴為我不留斯益友問天似許豈平心

幾回呵壁空搔首修夜漫漫何處尋

友到知心語忤多

余贈奉
塘舊句

忍令身後遽蹉跎寂寥響絕廣

陵散淒切音遺蒿里歌從此傷心空地下悲君託體竟

山阿窮泉有日還相見只是今生可奈何

憶換金貂漉酒巾平生痛飲最天真哭如荆璧人皆毀

罵到閻羅鬼見噴詩夢淒迷屋梁月醉魂馨透土花春

醉杯還禱君含笑休學秋墳唱太辛

其人斯在總帷飄髮髯魂兮大小招青草痕霑經夜雨

白楊色變忽商飈他年碑字淚應墮此日銘旌心尚搖

懷舊賦成空振觸夕陽鄰笛響蕭蕭

入室悲風吹颯然靈牀圍遶一鏡前女年十四兒齡八

婦泣淒惶母涕漣家祭要將何事告官衙拜得特恩宣

君歿即日恩命三等奉
典補兼式部三等屬

便云毫髮無遺憾骨肉還留不了緣

嘔盡精神摧盡肝遺書如見血斑爛身名豈共蠹魚沒

手澤不隨蝴蝶乾一代詩才其匹少千秋著述得傳難

繁余謾效羊曇哭須為披筐取次刊

內親高橋仙谿翁

賜

忌日會表弟國島昆

德仲安

上都各務岳丈

省三

設醮修祭予亦與焉席上志感

兼贈國島昆仲

山風吹送夕陽雞無數松釵落滿蹊中有一人其貌古

外圍萬綠與眉齊卽今樹罅傷蟬蛻空牘書巢伴鶴栖
悵絕焚香諸子姪尙思竹馬膝前提

傳聞游迹似浮萍有客鄉關獨自經苔徑流泉瀉階碧

竹龕燈火照人青橫空征雁歸無信啼月慈烏夢尙聽

今日逢君轉悽惻秋風重與感原鴿

今春家君至美濃寓國島氏倚竹書龕者兩句龜先妣舊廬也昆仲盤桓

晨夕曲盡個款今二人共來東京而家君遠游未歸故及

今秋七月引

國島鐵耕送其弟石耘上都盤桓數日將歸去應新兵召募予壯其行贈以是詩

今秋七月雨田禾生耳水流決八九月之交長安風沙

倍慘烈北鄰南巷往來絕杜老胸中屋空設所思不見

更踟躕木葉響如鄰笛咽

即亡友

知音不可作擬築望鄉

臺鄉關渺何處君自濃州來欣然相見愁眉開促膝不

覺連銜杯恰是岑參好兄弟當推入洛機雲才感君骨

肉至情重幾宵燈火對牀擁寒暄偶及歲豐凶無端又

觸填膺痛聞說前月月月在望宇宙昏墊疑洪荒頑雲晦

冥白日匿雨腳射地聲溷滂藍水蘇水怒漲黃巨防一

潰勢莫當廬舍漂沒民流亡濃州直接我鄉里中間只

界一江水水災乃若斯我鄉可知矣而今風激萬竅鳴

四野淒愴哀鴻征非關邊海干戈動

時清佛交兵

總是流民慟

哭聲忽傳府帖下點兵一何急君聞躍然起不屑婦女
泣我朝尙武祖訓遵儆戒又蒙宣諭諄如何黔首終不
悟動輒畏之如避秦只言子粒日辛苦豈知田是官家
土不思效報肆潛逃卽致流離彼自取刀頭忽已磨馬
鞍忽已馱鐵衣忽已束情絲忽已拖他人正悵快君遂
翻然往嗟予懷鄉久隱憂對此感激無以酬送行聊酌
一尊酒君亦一笑看吳鉤君弟獨留豈無淚也當恥灑
別離地把酒臨風一浩歌其中無限蒼茫意疾颿吹雲
如轉蓬見君意氣成長虹壯哉將相寧有種願贈君以
大王之雄風

月夜懷亡友蓉塘

不知蒲柳感秋先葉落始驚簾卷前半夜蟲聲牀上下
幾家人影月團圓羈栖有恨惟孤鶴中曲如啼是獨絃
何得詩魂來入夢寒衾虛幌只泠然

大風雨以後荒涼殊甚時正陰曆中秋陰雲晦冥
不見月色乃作

滿日荒涼蜚咽殘月娥欲照也含酸糝糊空際儘教暝
慘澹人間那忍看仙桂方薶香鬱鬱草花謾聚露團團
瓊樓玉宇茫何在哀雁無家祇自寒

十月五日毅堂先師三年忌辰先是諸同人相謀

建碑墨陀是日碑成因會客于八百松樓席上賦

此以抒感臆時古曆八月十七夜

白蘋薄言采碧泉于以酌祭罷先師靈痛淚泫然落回
憶輟瑟晨三年恍如昨人琴牀上亡山河眼前邈去歲
重陽節風雨滿城作酒酌菊花黃泉壤色盈杓今茲中
秋夜陰雲罨成幕當頭月暝蒙大地秋蕭索云建峴山
碑苔蘚青如削招魂鷗渡船會客墨陀閣冠蓋皆故人
寫履紛交錯獨我白髮翁天涯自栖泊家婦翁在備中故不與近接雁
足書舊事得其略小子願具陳諸公細裁度我翁年未
冠師也尚稗弱乃父益齋公潛心訓詁學傳家重紹承

授徒垂矩矱孔壁搜古文荆山抱奇璞甘老衡門下真

有忘飢樂時復歌黃虞我翁過從數漂麥啗書癡事具師本集中

師也何善謔良知雛鳳清嶄然出頭角稷稷萬松亭長

風卷乾籜寒月明四山虛籟咽遙壑是夜蕙帳空哀慟

只猿鶴髣髴彌留言遺孤我翁託萬古悲蒿丘一魂返

溟漠乃今師亦逝藏蛻城北郭想其守廬日鐙火照虛

幄讀禮不成寐荒雞鳴膈膊丙舍終淒涼丁年豈落拓

往從井大春謂緒詞敬所翁經術日該博名山與大川可以資磨

琢去去度函關行行入東洛結交多勝流詩書事揚摧

藎頭苦志際往往空囊橐師也恬不顧力學長自若沈

浸以濃郁英華默咀嚼一盞油已盡亦見于親鄰壁費穿鑿
羣兒竊調笑爾曹儘輕薄文章一騰燄坐使蚍蜉作學
成親不見贏得淚一握舉首望故林慈烏正啞啞時維
乙丑冬積雪皎蓮嶽爰應雄藩聘晝歸錦昭灼爭羨奮
健羽勢若摩霄鶚知誰效微力報豈銜環雀我翁久蹉
跎風塵苦束縛此日始開顏得了死生諾爾來二十年
師也益超卓極盡儒臣榮沐得聖恩渥白華孝子心朱
絃清廟樂更攷三禮圖鐘磬笙竽籥碑銘勒偉勳筆姿
奇駁犖小子何用言後世自捫摸聊陳三世誼誠恐未
詳確把杯欲問誰天宇忽開廓雲破涌蟾輪夜靜沈魚

鑰所思渺煙水日斷南飛鵲

古重陽日戲作

采采菊花影忽從杯底香吾人霑一醉何日不重陽葉
下秋聲煞鴻啼朔氣涼登臨亦多事已見滿城霜

萬壽聖節謹賦

萬歲千秋此一時觚稜初日照丹墀霜華錦豔紅楓葉
林影嵐濃翠羽旗直使鱗蟲躍靈囿豈無龍馬舞瑤池
駑才欲頌添慙愧不及卷阿召伯詩時小西湖競馬場新成行
開場式凡三日都人成市

詰朝趨衙遇僚友竹海子徒步而歸問何之曰偷
閒還家耳竹海子方膠續斷絃新婚燕爾則偷閒

二字中有無限風情在戲作一絕調之

蛾眉纔點香螺墨蓮漏催趨玉筍班怪底忙中偷得去
累他新婦不曾閒

平安山河行觀細川澄元甲冑圖像而作

平安山河如帶礪展開半壁蜿蜒勢錦旂日耀建章宮
畫戟雲屯列侯第滿營楊柳引朝儀雙閣金銀分夕麗
創業天皇桓武功窮侈將軍室町世將軍同姓說源家
管領春風御所花赫赫具瞻京兆尹紛紛只鬧衆蜂衙
旌旄有勢驅奴僕鷹犬無才用爪牙終使烽煙生輦轂
可憐骨肉亂如麻九郎弑父父非父卻笑嬖夫甘自苦

半生虛學太常齋當初多信妖人盪彌陀峰瘦寶蟾沈
鞍馬山深天狗舞夜闌空室忽無鐙白衣一線血如縷
六郎殺兄兄不兄閱牆轉託報讎名布粟入謠誰可咎
豆萁傳詠本無情一朝殺氣滿川陸五畿風勢動刀兵
篝火巖栖院中舉鞞鼓游初軒外鳴父血未乾兄血濺
新鬼吞聲故鬼怨獨有六郎意氣揚跨鞍笑赴凱歌醺
一從蚱蜢蔽空來乾坤板蕩幾爭戰至今齒冷爲蟲沙
誰知仍向畫中見馬長八尺勢絕倫金甲光纈如魚鱗
小刀挾腰鞭在背大刀橫偃月半輪髭鬚鬢鬢面微赭
秋水雙瞳疑有神誰其畫者狩元信誰其贊者僧周麟

訣辭滿幅巧鋪設居然裝出人中傑一時威風洵有之
詎怪此輩眼花熱所嗟王氣正銷沈須臾將門亦潰裂
么麼一圖乃瓦全虛名究被豎子竊事往茫茫且勿歎
依然形勝是平安桃花春水鴨川暖鬢影朝雲嵐峽寒
劫後樓臺間碧樹夢中宮闕尙朱闌何事詩成轉怊悵
滄桑都作畫圖看

寒柳

解識徐娘半老情隔江商女讓輕盈分明舞認踏筵影
忽漫歌傳亡國聲疏雨飄殘煙欲閉晚風吹墮月空橫
春前誰問隋隄路不及荒宮有曉鶯

幾人縮別短長亭壩上疲驢忍重停夜雪打篷漁獨釣
水風拂面酒微醒裹身畢竟非春絮黽影何由有晚萍
陡覺笛聲吹欲凍休教少婦倚樓聽

爲誰消受朔風涼黯澹天陰無夕陽羌笛聲飛關阻雪
漢臣節落鬢成霜夜啼啞啞烏虛繞昔往依依客謾望
我見猶憐樹如此寧堪真箇上河梁

流水無聲月滿船夜深尋入渡頭煙不辭白髮悲岐路
誰學黃楊厄閏年時聞成爲柳北之計彷彿影生苔碣後婆娑意盡酒
樓前臨風忽灑傷心淚他日攀條更泫然

十二月書事效詠史樂府體

韓王色變股栗坐羣臣欲奔足忽跛當殿喊者何洵洵
滿城皆賊滿天火火勢騰空爆瓦飛賊兵攫人如摘果
焦頭爛額民逃生路衢死者血相裹皇天疾威可奈何
三年兩度此慘禍黎庶蕩盡靡孑遺宮門洞啓誰人鎖
彼赤者旗烈焰中日本星使來救我王踊躍起臣歡呼
誰識清軍在其左清軍賊軍蟻聚來疾風吹火颯乎大
太妃招王王慟哭清軍拍手笑喧吹汝盍痛絕日本師
否乃汝心持兩可彼兵潰散何所恃眼看西大門打破
王躬不閱恤豈違覆巢固難護危卵一夜崑岡玉亦灰
黑煙變作彤雲簸長風烈烈冰峨峨前有大川渡無舸

鼓皮瑟縮噤不聲雪花血片如掌墮

歲除日志感用厲樊榭歲晚南湖詩韻和巖谷

修

丁野遠影兩史監

健羽摩霄鴻謾騫寧知真樂在丘園檀欒時聚禪鐙影
懵懂長依醉壁根鐘杵空林霜有韻梅花寒水月無言
是時詩境忽清絕風笛一聲飛入門

米價長安漸不低那堪歲晏此中栖馬嘶風亂猶依北

松頂霜摩欲向西時家君歸期在近無奈流年疾于箭且拚終日醉

如泥關心一事啁啾雀偏傍空倉續續啼

憶得明朝忽是春江東車馬鬧香塵一樓舞袖猶回雪

沿水歌腔已應蘋守歲猶挑今夜燭及時定笑去年人
山妻卻指古梅影只此郎君終始親
不須尋到水之涯卽妾前身是此花瓶小枝宜釵樣插
牆高影自髻邊斜有時織格寫黃絹無分宮妝乘鈿車
休因鶴子嫌添累正似當年處士家

除夕醉後偶作用石埭韻

權得觥船盪酒波浮生未必寄潛沲春從屋角梅枝出
心與懷中刺字磨落落爲人太無賴年年此夜獨如何
鐙前一種淒酸氣沁入詩脾冷味多

槐南集卷四

槐南集卷五

東京 森大來 公泰

乙酉

元旦早朝卽事

九關魚鑰啓更闌星斗初稀萬宇寒玉馬將春馱入苑
仙雞催曉喚登壇例隨鶴序趨丹闕恐被梅花笑冷官
猶有酒香熏滿袖天街一路步蹒跚

新正初七同史館諸人會飲墨水酒樓席上戲賦
人日題詩非草堂江樓春色自微茫柳拖新水三分碧
酒與雛鶯一例黃我輩情偏鍾粉黛諸公筆尙挾風霜

從今須學驚蝴蝶眉史修成不厭忙

晚天雪大作眺望殊佳於是盡醉極歡矢口成章
又得一律

十二重簾面面風謝家飛絮正空濛奇寒凝酒鬚眉綠
豔舞泥人裙帶紅恍訝月痕搖素壁乍如花影透珠櫺
高樓一夜此豪興都勝淺斟低唱中

賦得雪中早梅

破暝空濛雪其中一線春梅花林子伴柳絮謝家親特
地香如活嫣然笑逼真窺牆初試態臨水忽傳神影溼
漁篷重光黏鶴瞥新笛孤吹裂鐵牀冷未銷銀蕤豈蒼

苔徑僵宜古竹鄰騎驢無限興任付灞橋人

漢城太尉行

陸軍太尉磯林真三殉漢城之難余歌而哀之

四坐酒酣投劍起蠟煙矗立髮上指聽我歌出漢城太
尉行髣髴朔風鬢發怒涌黑河水河水合涼雩并太尉
馬蕭蕭鳴其前一騎倏馳突欲言不得口咄咄咄咄戈
一揮手指血染衣漢城使館旦夕破滿奴鼎沸韓兒圍
太尉聞未畢決背風慘栗勸之走仁川揚鞭一聲叱急
難不赴非英雄直騰而上馬在空空中雪花熱如燬但
見烈火通天紅是時公使幾鏖戰敵兵三面火四面奮

身跳出西大門彼衆欲追正傳箭馬如電掣聲疑雷此
人母乃天上來疾呼僂突敵膽褫左右披靡風雲開忽
然一礮馬震斃瓦石雨注刀爲摧齧牙飲刃血四射顏
色不變吁烈哉吁烈哉長太息日本太尉死其職君不
見閩江陷沒障無人竄如鼠者張佩綸是乃桓桓滿清
之虎臣

梅花下戲賦長句用神波卽山桓樂多樓唱和韻

逢場作戲竿與木有時鬪笑夜秉燭照出梅花光陸離
其中容我頗不俗翠羽翩然銜書來有美一人在空谷
雪姿綽約煙態娟橫自陳兮月窺屋當時老逋雛鶴俱

已比團纒聚骨肉如何只說山名孤清愁有餘歡不足

越後阪口秋山義寓余茉莉巷者泱旬今將歸去

倉卒賦此作餞

春風出谷鳥啼過誰信驕人念舊窠鄰壁借鐙穿古竹
屋檐栖月補疏蘿留賓愧我曾無榻彈缺令君幾有歌
忍說明朝越山路馬蹄犯曉雪猶多

題黃小松易孤山絕秀圖

絕秀孤山隱翠微湖光澹綠接林霏道人酒興濃於墨
潑得梅花香上衣歸興濃於酒波光
綠上衣小松句

踏青合唱冶春歌如此風光奈畫何短艇花搖蘭槳影

長橋柳漾麴塵波

薄雲濛處曉鶯鳴忽地南屏鐘一聲好是前谿水初綠
梅花漱玉洗春醒

遺世同誰結古歡春山黛色秀堪餐多應嫌此花幽獨
換得佳人翠袖寒

此圖本為屠琴塢倅而作故曰潛園過訪湖莊寫竹
數竿而去余寫此一卷聊以作荅潛園琴塢別號

和黃吟梅留別之什卻贈

無數仙槎縹緲邊惟君曠逸近推賢不期蓬島春來早
未見梅花客去先

時乙酉二月正當彼曆
甲申歲杪梅花未開

清酒百壺思餞別新詩

合璧許吟聯殷勤此意酬何日望斷雲濤萬里天

叱石成羊記姓黃可將海水變枯桑滄溟杯瀉濛濛影

雲漢文回奕奕光仙子折花爭結佩天風吹霧欲褰裳
好持織女七襄錦唱出大東詩幾章

雪中即日志感

畫橋新柳不勝纖天遣顛狂飛絮添幾處春搖乘興舫
誰家夢護卻寒簾紅浮人臉酒香纈白了馬髭冰淚黏
忽地心酸仍猛省此時凍餒有蒼黔

二月二十一日舉男是日先妣遺稟刻成并紀誌
喜

幽谷春生鶯婦巢新雛初韻出梅梢前宵驗得燈花卜
一索居然是寶爻

供養古梅花一枝

遺棄名古梅廢

年年家祭涕漣漉

先妣忌辰在二月十三日

從今

與爾慶生誕同是春風二月時

鳳文館銅刻佩文韻府告成館主前田圓徵詩於

余因賦長古一篇

趙宋太清樓朱明文淵閣滿清武英殿三者足窺帝王
崇文之大略咸平當日重收藏不聞蒐獵有述作永樂
大典垂寶光零璣斷錦自赫灼嗜痴獨笑韻玉書穢蕪
未免鈔撮學思文康熙集大成天家果見萬物彙想其
宵衣旰食餘熏風滿殿涼溢除午陰罷講開瓊笈乙夜
然藜照縹書菁華薈萃六藝圃宮徵含咀四聲譜揀雅

非關詩取官矢音終欲韻爲府豹佩文者人剝之原命
名意蓋在斯要供千萬人搏摭所以上自經傳子集下
及叢談瑣記包羅靡所遺秦漢魏晉賢哲語唐宋金元
前輩詩意匠經營摛華揆藻巧風流笑罵佛緣仙趣奇
臚陳一一韻抽出宛是珊瑚挂網絲如彼羣玉等魚目
球璆琳琅斑陸離天裁獨極此大觀直與日月星辰終
古垂御製序文揮逸翰發揚似有卿雲爛漫說鴻恩四
海宣惜夫寒士空囊慣天下購者能幾何鳳文主人喟
然歎混沌鑿破鉤吾銅匠人斤墨費劉鑿鐵刀深入鉅
黝綠字痕密栗啼鬼工觸牙機轉響軋軋運璇衡動聲

隆隆一夜印成五萬卷惟此已是非常功何況人人皆
得讀價廉不愁錢不足從今華門圭竇中居然大帙堆
於屋抵得聖王涵養心我知俊髦承澤深文質彬彬刮
目待絃歌齊奏韶濩音吁嗟乎漢土歷朝換兵劫誰似
二千五百餘年大化洽乃有如主人以潤色日出處天
子中興業

喜阪口五峰

恭

過訪賦贈

緣情詞賦擅齊梁越女三年笑口香此際溫柔存比興
近來奔軼見文章雄才堪角中原鹿銳意休亡岐路羊
知否伊余傾倒久相逢未忌醉言狂

偶感似五峰

孤芳謾道陋羣妍詩境漸嫌言象詮齊物將窺古蒙叟
移情無復一成連偶由人籟參空理記借天風鼓水仙
自失鍾期今已矣爲君猶撥兩三絃

雨中長酌亭小集似回瀾社諸子

酒人只要醉顏酡不恨坐無紅妓歌依約山痕眉半畫
空濛湖影鏡新磨暮來簾雨應神女花上春風是孟婆
誰道水光晴更好欲持此景問髯坡

此亭一醉卽長酌四坐休譁聽我歌學派中流存砥柱
文心寸墨費研磨詩人獨愧風騷主花事空憐春夢婆

從是湖天好煙景只應同訪古梅坡

直廬坐雨鞍懸男松平康國二子忽然攜酒至率賦

一章致謝

檐花微落雨聲香又聽啼鶯隔綠楊半日偷閒輒思飲
一官如戲且登場乍驚粉署逢詩友誰信金貂換女郎
女郎酒名慙愧我才非李白使君謾做四明狂

三月二十七日家大人瘧疾新愈大會客湖心亭
席上和其病起題壁詩韻以紀一時之盛

珠簾高卷小湖瀕冠蓋雲生滿坐春皆道踏青尋夙約
相攜浮白壽尊人詩禪參透梅花偈舞妓現來楊柳身

要使祠頭天女和清歌搖曳繞梁塵

又一首次枕山老人韻

四面蒼茫返照斜須臾山影水紋加交飛觴似受風燕
病起詩如經雨花豫擬新居重會客時方修築菜
畦巷四處只愁狹路

不容車諸公一笑能臨否斗酒仍須醉物華

又一首次池田綠所緯韻

半空清梵落歌筵回首林霏正杳然鬢髻山呈青似佛
鬚眉水鑑皓疑仙梅花笑介先生壽文字誰非過去緣
更倩佳人扶醉影酒香散作滿湖煙

春霖歎

正月不雨塵冥濛二月三月雲而風奇寒中人忽作雪
何曾一日春沖融比來封姨怒於虎又見商羊頻鼓舞
天眼母乃真模糊花時偏下黃梅雨始爲霰霖後滂沱
平疇漲綠水浸莎淋漓泥滴饑婦髻惺忪煙溼春農蓑
春農無飯淚滿甕力耕贏得飢腸痛去年荒歉又今年
看看新秧不可種更傳河水高於壩誰管邊境遙飛烽
官家何事苦戒飭未有一詔寬租庸米價低昂變倏忽
轉令商賈恣奸猾商賈一攫千黃金農夫淚枯只見骨
我聞不覺再三歎豈獨爾輩心含酸春人自有振觸處
花事全如稼穡難梅花未落笛吹裂桃花欲開灑鵲血

海棠憔悴牡丹寒杏花李花不須說連宵風雨悲莫悲
慘過人間生別離萬紫千紅共黃土可憐一樣賸空枝
此心與爾寧有異也應同問老天意五風十雨幾時能
寒若燠若何代事方今海外弄干戈時論紛紛戰與和
至尊宵旰憂念切無怪經旬陰晦多我向天公別有願
不比爾輩謾嗟怨世無兵甲民歡惊一春無花亦何恨

四月十二日依田學海先生百川過訪相共觀花東

台

十日愁霖不放晴可堪夢裏咽啼鶯忽然破曉高軒過
特地將春空谷生濃翠欲教山影滴新紅似借霧痕明

催儂花下尋詩去客與天公兩有情

同杉山三郊小酌鶯谿酒樓卽送其赴西肥

雨晴水墨澹披圖偏覺餘寒集酒廚山色當簾如潑乳
花陰有鳥勸提壺問君折柳愁何限可是隨春去也無
知爾客衣空慘綠鶯谿早已長蘼蕪

題松平康國詩卷後卽送其漫游米國

劈頭先署破天荒絢爛詞騰五色光如此異才經百鍊
便應奴僕命媧皇

欲將春信寄麻姑東海揚塵果有無剛是扶桑花未落
如花旗影認桑扶

十九日同回瀾社諸同人汎舟墨水觀櫻花賦得
嬉春絕句十二首

寒食清明雨似絲恐人孤負冶春時放晴一日花齊發
我愛東風作意吹

紅櫻花外有黃鸝啼近青青楊柳枝巧把春光相襯染
寫人游意上晴絲

晴絲裊裊滾香塵春水溶溶照麗人知向誰邊回顧笑
有花影處畫船鄰

花影滿川搖夕霏波光如練拖斜暉蝶兒認做湔裙影
故學蜻蜓點水飛